


OTUPHELIWA WA WAMERIKA

 . . . otthuna w'Apwiya wira itthu kamosa-kamosa siiranye imaara kamosa-kamosa. Hiyo naahirowa oDenver, naanaanoxa, khutthika. Kookupali wira kintthuna kihimye, muthukumano: Waari mmosa wa mithukumano sooreeraxa kitonko aka okhalana mwa miyaakha. Naahiviriha okathi wooreeraxa. Oovikana vakhani imiya piili yaahivahererya mirima saya wa Kristu, waahiya ale yaakhenle opatiiso wa Erooho Yoowaarya, ohiya ithoonyeryo suulupale ni mitikiniho Pwiy'ahu Yesu iiraly'awe eriyari y'atthu oDenver iwe. Naahikhalana omwaraxiwa wuulupale, ni muthukumano muulupale w'atthu. Hiyo naapacenrye ni oophiyaka ikonto thanu, opacerya wene. Ni naarumeenle Mammoth Gardens. Nto ohiyu wa neeraru, khiwaakhanle hata opuro wira atthu yeemele nipuro nenlo. Naahiviriha okathi wooreeraxa, wa ohiyu mithanu.

² Hiyo khukhuma iwe, wira nirowe oCanada, mwan'aka ni miyo. Vano hiyo khuwela mmyaakoni, khurwa mwanankhaya a nakhutu. Kinoona wira nyuwo muhiwa yeeyo, muraatiyuni mwanyu. Ni atthu emiya emosa ni miloko mithanu na miraru ni araru khupweteya mwa yeeyo. Ni hiyo naahiphara vanakhutuni oowuukeleya mwa—mwa—mwa mahiku oowaatta, osulu iwe mmyaakoni. Nto muthukumano ahu khuvira, vano hiyo naahaana, otthikela owaani vano, nihinatthi okhuma-tho. Tivo hiyo ninnaamini wira sothene khino waari wa otthuna wa Muluku, wira onoorowa okhala mu—muthukumano wooreera, ni etthu ekina. Owo aahikhalana etthu yoolokohiwa wa hiyo nihinsuwelaahu.

³ Hiyo mwa enamuna emosa nineetta molumwenkuni mooriipela, masi kahi mw'epiphini. Hiyo ninootthara paahi, okathi Waarya onrowaaya, vano hiyo ninthara Waarya.

⁴ Nto Tith'ihu a Wirimu alakela aahikhalana etthu hiyo ehinsuwelaahu hat'etthu ya yeeyo. Khino yaahikhala ehasara yaaphwanyaneya osulu iwe. Wala, emaara ekina, Owo khino onvara muteko wira amuruuhe mutthu. Moone, Muluku ookhala oovaraka muteko mwa mutthu mmosa siiso; Owo onoorukunxa elapo yothene mwaha wa mutthu yoowo paahi, wira aaruuhe. Nto vano hiyo noosuwela wira yothene yaari wa ovuwa wooreera wa Muluku. Ni ninnimuxukhuru Yoowo mwaha wa yeeyo, ni mwaha wo onikhapelela. Nto yaahikhala anci-ene, hiyo . . .

⁵ Billy ni miyo naahikhaliherya waattotta, mphironi n'itthu siiso, y'atthu yaaphwannye ehasara ni sothene. Masi hiyo naahivira woohikhala hata mulattu. Naakhumme mphironi emaara emosa, masi eyo yaari mwa okathi vakhani. Ni

mulopwana mmosa osulu iwe, khukhuruwa khunikumiha ni etaratoore. Nitherekuwaka paahi; waari woothererya saana.

⁶ Ni yaari emosa wa itthu awo yahaakhalanne aya mwa. . . khiyaawerya, atokweene khiyaawerya wuupuwela wira aatoko okhalana mwanankhaya ntoko ole, elapo ele, okathi ole wa mwaakha, Roundup, Montana. Ni hiyo naari. . . Hiyo noosuwela wira etthu p'itthu yoosuwanyeya ntoko eyo, ntata na Pwiy'ahu naari mwa yeeyo nipuro nlo. Yaari mwaha wa niwoko nimoso, wa—wa mureerelo ahu. Wa mureerelo ahu, ti yeeyo yaary'aya.

⁷ Nto siiso miyo khimulikarela Munna Neville, vahokolonwaaka, nto miyo khwira, “Kinrowa okhala owaani Ttiminku. Ni—ni nyuwo mwatthuna vale wira miyo, kikhuruwe khino kikhale ni exikola ya Ttiminku, vano, vaareera.” Nto miyo khwira, “Vano miyo ki. . . ni kinootteeliwa murima saana orowa.”

⁸ Owo khwira, “Vano, vekeekhai, Munna Bill.” Khwira, “Hiyo okathi wothe ninnitthapa vanci-ene mwaarwaaka,” ni murima muulupale woothukuwa ni vooreera, ntoko owo. Vano nto khuhela mprokraamani mwawe mwa raatiyu, nsana. Tivo hiyo ninnixukhuru mwaha wa itthu iya sothene.

⁹ Ni voosiis'ula, vano, okhalaka Nihiku n'Aximaama. Atthu anci-ene, muniwa soolaleerya sa Nihiku n'Aximaama mapuro othene, ni atthu alavulaka sa maama, kinuupuwelaaka wira ti vooreera. Muhiye eyo ekhale ya okathi mukina wa muteko.

¹⁰ Voosiis'ula kaahihimya, wira, mwaha—mwaha wa *Otupheliwa Wa wAmerika* yoowo kaatthunaaka olavula. Yeeyo, alakela nyuwo muhiwa mprokaraamani mwanyu a muraatiyuni, ni munoowiiwa anci-ene a yaawo olelo. Ni enookhala elaleeryo ya Nihiku n'Aximaama, khino, olelo ohiyu mmutekoni w'okokhorela. Nto siiso miyo khuupuwela, voosiis'ula, wira kaamuhimya, “o—otupheliwa.”

¹¹ Miyo kaahilavula yeela oDenver, nno, kahi voolikana ni enamuna yo ohimya entthunaaka ovaha voosiis'ula, Muluku atthuna vale. Ni, ela, naahikhalana okathi wooreeraxa ni yeela. Apwiya yaahireeriha mwa enamuna yoothamaleya. Eyo mwa enamuna emosa imaara sikina enninivaha e. . .

¹² Nyuwo muhaana otathiwa vakhani paahi, wiira musuwele enaasiwa exeeni, khanirina, imaara sikina? Ni hiyo ninvekela wira Muluku aire.

¹³ Nto, p'uhimya wene, wu, vamaalinhe ahu. . . Alipa a Nakoso a oDenver ti yaakhalihenrye muthukumano, ni waari okhaliherya woovirikana vakhani wa iye kitonko aka okhalana khalayi.

¹⁴ Ni voolimaleleya, arumeyi, yaakhaliheriyaka muthukumano, aniira. . . “Moohimya yeeyo?” “Ayo, ohimeerya ekereja.” Ni enkhalala mwa yeeyo. Amakhampusi ti siiso; awo antthuna wira

nikoto naya nisuweleke yeeyo. Nlo nuulumo nooreera paahi. Owo mwaha aya.

¹⁵ Masi Alipa a Nakoso yaari oovirikana vakhani. Awo yaathuna wira olumwenku osuweleke yeeyo, tivo awo khukumihia itoolare soophiyaka ikonto tthaaru wala xexe vo olaleerya mukarerani mothene, mutaakisini, iparaxooke sothene sa ikaaro, ni mapuro othene. Naahikhalana okathi wooreeraxa.

¹⁶ Vamanlyaya muteko, awo khukiitthanela epante aya, khwira, “Munna Branham, niwiireleke-ni exeeni vano? Exeeni erinaahu woolivani?”

¹⁷ Miyo khwira, “Vano, vekeekhai, hat’etthu.” Miyo khwira, “Nkinoolokihani etthu.” Miyo khwira, “Nyuwo, munooliva ekontha aka ya wooteeli, ohitto nno, mwatthuna vale.”

¹⁸ “Oh, ninthuna owiirelani etthu.” Nto awo khaya... Nkaarowa okupali etthu yawaya.

¹⁹ Vano mulipa-ookhapelela khuwiitthana. Owo khwira, “Kookupali wira mwa enamuna emosa owo omusivela oxaya ni omesa, khommusivela?”

Owo khwira, “Ayo.”

²⁰ Vano mmosa w’alipa a nakoso aahikhalana ematta iwe, nto owo khwira, “Miyo kinoompakela yoovaha ya yeeyo.”

²¹ Ahe, Mwenye Moore khurowa wona. Owo aahaana osusa ikilomo soophiyaka miloko mithanu ni thanu na mosa, ni ekhavalu. Miyo khwira... Mwenye Moore khwira, “Kaatthuna kimoone Munna Branham muthiyana okilaanthe vakhavaloni, mpakha ophiyerya yeeyo.” Tivo owo, awo, ni... .

²² Masi, nuumala yeeyo, nnya, awo yaahirowa iwe nipuro na empa y’okuluttuni oSilver Plume, oColorado. Ela ehaana okhala epante ela vano. Ni awo aathuma ematta ekhaani weiwe, ni ankitekela empa ya ikatthi thanu weiwe vano wira... oSilver Plume, Colorado, yeeyo eri eriyari ya miyaako. Tivo, nyuwo alipa-oomesa, kinoona wira okathi wooreera, tivo naamukhala nipuro nooreera wiitthyuuwa, nto okathi nuuvira mithukumano ni itthu, Muluku atthuna vale. Owo t’onsuwela, moone.

²³ Miyo kaatthuna vano wira niwiriyanne Masu. Ni miyo vekeekhai okisivela Masu, Masu makumi a Muluku. Eyo ti wii, muhina mwa Masu ti Ekumi. Vano, “Masu, yoolempwa, enniiva, masi Erooho ennivaha Ekumi.” Ni Ekumi eri Mmasuni, okhala wira awo Masu a Muluku. Ekumi eri Mmasuni.

Ntoko soohimenryakani, “Kinnoovahani... .”

²⁴ Nyuwo muniira, “Miyo koovoliwa etala, voosis’ula, Munna Branham. Mwaamukivaha itoolare thanu?”

²⁵ Miyo kaamwiira, “Kinimoovahani.” Vano, yookhala ekumi yinci-ene mwa yeeyo ntoko siriyaya muhina mwa natiri aka.

26 Ti siiso ery'aya ni Muluku. Muluku alaiherya-ru etthu p'itthu, nto ele okhanle Muluku, Yawawe. . . Owo ohaana okhala Mmasuni mwAwe. Munnona? Masu ala khanafaita. . . Masu ala vekeekhai ti siiso ntoko Muluku. Awo Mulukuu.

27 Masu anyu t'ile mukhanly'anyu. Ti waahati wanyu; naaitthanakahu. Waahati wanyu ti nuulumo nanyu. Naahiweryeke okuxa nuulumo nanyu, weeso nkikhanle olipanaka. Masi kaweryaru okuxa nuulumo nanyu wa etthu p'itthu, vano mutthu a nttittimiho.

28 Ni Bibilia ohimnye wira, "Wopaceryani naari Nsu, nto Nsu naari ni Muluku, nto Nsu naari Muluku." Munnona? Munnona? "Nto Nsu nihiipaka erutthu, khukhala ni hiyo."

29 Vaakhanle wira naamuupuwela, ela, elapo ene hiyo enkhalaaahu, voosiis'ula, ti Masu a Muluku. Mwiri *ole* Masu a Muluku. Ni nyuwo, erutthu anyu, Masu a Muluku. Muluku oroolavula wira ekhale siiso, khupaka vooikhala etthu; yeeyo yahaakhanle etthu.

30 Mootoko oweha ekumi ya mutthu, onikhumaaya-wo? Erukuruku emosa ekhaani, ekhaanixa nittho na mutthu nihinweryaya woona; ni elenti yuulupale ya ikuru paahi. Nto vaavo onkhuma mulopwana a ikhiilu miloko mithanu na moso ni thanu moso, miloko mithanu na mixexe. Okhumme woowi? Munnona? Muluku oroolavula paahi, nto khupacerya, ni ephattu, yinnuwaka, nto vaavo khukumiherya voolikana. Owo oroolavula wa khula mwiri, itthu sothene, wira sikhale. Nto eyo etthu yooreeraxa, yooreeraxa, voosiis'ula, woona Masu a Muluku.

31 Vano, ela, voosiis'ula, mwa Waataana Wa Khalayi, nikhunlaka mwa Wahala. Miyo kinnikhalaka oonyoonyiwa vakhani paahi. . . Mukhunlaka vano mwa Wahala, kapiitulu 18. Ookhulumuwa vakhani paahi. Masi Apwiya yatthuna vale. . .

32 Nkikupanli; ninoosuwelaxa Namararu ohiyu. Apwiya yatthuna, ni ekereja yoona-ru weettiheriwa siiso, Kaatthuna kikhallane Namararu, Namaxexe, Namathanu, Saapatu, ni Ttiminku, ntoko muhakalaliho va, muhakalaliho wa mwixuttiho paahi wa Masu. [Muthukumano oniira, "Amen."—Mol.] Namararu, Namaxexe, Namathanu, Saapatu, ni Ttiminku, wiixuttiha Masu paahi; kahi miteko s'ovoniha, masi mwixuttiho. Khino Apwiya anooneettiherya siiso. Vano nto hiyo. . . Miyo okisivela okhala ni nyuwo ni okhalana opatthana mwa Masu, ni nyuwo. Kooxukhuru, vanci-ene, "amen" owo ooreera, oothamaleya.

33 Vano, kapiitulu 18 ya Wahala, opacerya eversikulu 12, nintthuna nilipiherye miyuupuwelo sahu, wa okathi vakhani paahi wa mwaha ola wa ekumi wa nihiku. Wahala Oopace. . . , ahiiso, Wahala Aneili, kileveleliwe, Wahala Aneili 18:12,

ni ninrowa osoma nipuro nimosa na yeeyo va, ni woona etthu Apwiy'ahu anthhunaya wira nisuwele.

Namitthaka aaronwe omwiithana Mikaya aahimuleela, wira, Moone, moolumo a maprofeta mamosa animuhimeerya mwene sooreera; kiniira, nuulumo nanyu nave, nikhale ntoko awaya, mulavule moolumo ooreera.

Vano Mikaya khwira, APWIYA akhanle akumi, hata ele Muluku aka nrowawe ohimya, yeeyo kinoolavula.

Vaphiyale-awe wa mwene, mwene aahimuhimeerya wira, Mikaya, nrooke oRamothi-xileyati okhottoni, wala nihirowe? Nto owo khwira, Murooke, munooreeriwa, ni munoovahereriwa mmatatani mwanyu.

³⁴ Vano, wira nilipiherye muupuwelo ahu okathi vakhani; nuulumo nimosa paahi wa Yoowo, mwa yeela.

³⁵ Tith'ihu a Wirimu, ni mirima sooxukhuru hiyo ninniwaattamelani Nyuwo okathi ola, mwaha wa minepa sirimeenle, w'ale akhanle othoiwa, mwaha wa ekereja. Wira, Erooho Yoowaarya ekele Mmasuni naanaanoru vano, hiyo ninnivekela. Yeetiherye olukama khula murima va okhanle woothoiwa. Ni okathi Eyo eninnyaya Mutthaka Aya wo owerya wa Masu mmurimani, hiyo othene nittottele muraarelo mwaha wa Yaawo, voosiis'ula; nirowaka, nihiyaka etapernakulu, nitthapaka ni nimuttotopelaka Muluku, niiraka, "Mirima sahu sinniniviha mwa hiyo, mwaha wa Mukhalelo Awe." Vano hiyo ninvekela mwa Nsina Nawe. Amen.

³⁶ Yookhumela ahu enttharihela, voosiis'ula, mwa maxakha. Ni Waataana Wa Khalayi, wa miyo, kweekwe ti eruku wala e—wala ehimyelo s'oholo wa Waataana Wa Naanaano. Imaara sinci-ene, yoohimmwa, "Munna Branham, mwaha wa xeeni nyuwo kweekwe okuxaka Waataana Wa Khalayi? Ntoko kweekwe, mukuxaka yoosoma, muntthikela mwa Waataana Wa Khalayi." Miyo kinniira mwaha wo wira okisivela nlikanyiho. Okisivela . . .

³⁷ Osoma waka ti woohihipiya otthu, ntoko othene munsuwelanyu. Nto enamuna emosa paahi kinsuwelaaka wira kaattamele eri yoolikana, onkhala woona ele yaari ettharihelo, owehaxaxa ettharihelo ni woona ele yaakhanle. Vano nto koosuwela wira ele yaari *eyo* enookhala yoolikana ni ele ekhanle *ela* va, okhala wira eruku ya yeela. Ni miyo kweekwe kinweha Waataana wa Khalayi wira koone etthu aana a Isarayeli yiiraly'aya, woona ele yaari ehukhumu ya etampi, woona ele yaari exariya ya maprofeta, woona ele yaari ithu sothene iye; vano nto kinookhalana muupuwelo wa ela ekhanle *ela* va, yeeyo enthoonyeryaka khalayi ene ele enrowa okhala emalelo ya sothene wookiseryani.

38 Okathi ene yoola, yaahikhala etthu yuulupale yaakhumelenle wIsarayeli. Aari mw'epiphini wa ohiyu aya eriyari.

39 Mwa Waataana Wa Khalayi, Apwiya yatthuna vale, khino mmitekoni s'okokhorela sinoorwa, kaatthuna kooniherye moota Okathi Mithanu na Miili sa Ekereja saathooneryaya mwa Waataana Wa Khalayi. Moota iyo sipacenyaya voolikana ntoko wo—wopaceryani wa Okathi wa Ekereja wa ekereja y'Amalapo, ni khurowa voolukama ovira mwa okathi mmosa wa epiphi voolikana, ni khukela okathi woovuwa wa Pentekosite, woomorani wa Erooho Yoowaarya mukereja yoopacerya ya. . . okathi w'aYuta. Vano eviraka okathi mukina wa ekereja y'Amalapo, mwa okathi w'epiphi, vano nto okhuma-tho oMileeniyu, wookiseryani.

40 Vano, moota iwe miyaakha imiya sa eriyari, mwene ola muulupale Akhabi aakhumelenlyawe mwa owerya. Ni owo mwa enamuna emosa eetta vasulu va nttittimiho wa mamwene makina a Isarayeli, yoowo aari. . . Akhabi, mwaneene, mwa enamuna emosa aari mu—mulipa-oowaamini a mmukaanoni. Miyo imaara sinci-ene kinnimuhimyaka owo siiso, okhala wira owo aakhala epantte ya okathi epantte *ela* ya mukuso, epantte ya okathi epantte *ele* ya mukuso.

41 Khivaarowa osuweliwa nipuro n'okhala, mutthu okhanle oohilipa siiso. Wala, mutthu onihimya okhala muKristu, ni okhanle oohilipa, khamunsuwela etthu yo wira ni mutthu owo. Olelo aKristu; meelo khivansuweliwa vary'aya. Mukereja olelo, awo anoohakalala ni wiipa ni omuttotopela Muluku; nto meelo, iwo awuryaka, ehapaliwaka, atthimakaka nno ni nno. Vano ti yoolipa okhala nnaata ni mutthu siiso.

42 Miyo kinnuupuwela, kiryeene mmiravo, emaara emosa naahikhalana e—ekhavalo ya khalayi, yeeyo yaatuphaka mikuso okathi wothene. Ni kinoona wira anci-ene a nyuwo alopwana, a munnuwelo aka, mwaamusuwela wu mahiku a ikhavalo, mahiku a exarete. Miyo kaarwaaka okathi munci-ene, kikhuruwelaka ephiro ela ohitto nno, keettihaka ekhavalo ni exarete, yoomi. Kirina miyaakha miloko mixexe ni mithanu. Tivo, awo. . . Miyo kinnuupuwela, ekhavalo ela ya khalayi, hiyo naahelaka ekheero muxikoni mwaya, ntoko mwaarowaanyu wiiriha enyompe, wira mukhottiherye otupha mukuso. Nnakhala vo eyo yaanitupha. Nto eyo yaamurukunxa ekheero eyo, ni orukunuwa vovirikana, ni siiso. Eyo yaavira vasulu va mukuso. Nto nihiku nimosa, etthu eyo. . .

43 Miyo kaanitikinihiwa exeeni yaamukuxa murima owo. Ni naahikhala nlitti n'okela maasi nuulupale ohitto iwe. Vano, eyo yaari muhina mwa alfaafa, oh, oorakama, masi yaatthuna. . . Yaahikhala mataakhuru a malaxi mulittini n'okela maasi. Vano eyo khutupha mukuso ole khukela mulittini mmwe vaavo waari

araami ala othene ni eviituru, vaavo naryaahu. . .mwawihu—moohela-mo ikokhola, khukela mmwe wira aphwanye malaxi ale vakhani a munyepu. Ni naahaana ophwanya ikhavalo sikina wira nimukumihe valittini vale. Vaakenlyaya mmwe, yaarooophara. Nto okathi yeemenlyaya vale, yaanithukumela ni ovuuva ephome, ni—ni moota eyo yaaryaya, wira ephwanye vakhani paahi, wala makina, a malaxi ale a munyepu, okathi yaaryaya muhina mwa alfaafa, oohalela ophiya mmakuthani mwaya.

⁴⁴ Miyo imaara sinci-ene kinnuupuwelaka elatarato eyo. “Ephiro ya namattheke ti yoolipa.” Eyo khiyaakhanle yoomaala tu nipuro naalyaya ni oviriha okathi wooreera, masi e. . . eyo yaahaana otupha mukuso ni okhala yothene yoovulala ni yoothikalaseya siisaale, wira paahi ephwanye vakhani ma—malaxi a muthinto mukina woovirikana. Vano, eri ntoko siiso atthu aniraaya, antupha mukuso wa munyepu wa Muluku. Khimunaamini yeeyo? Onookhuma, onookhuma olelo; onookela. Ori mukereja, ovirihaka okathi wooreera; vano, meelo, onimwiitumiha mwaha w’etthu siiso. Eyo enkhalala yoolipa saana.

⁴⁵ Akhabi aari mutthu ntoko a enamuna yeeyo. Khula epantte ettheke yaarumelaya-wo, Akhabi aakhalana ntthanka nawe noovenxiwa, yaakhanle epantte *ela* wala epantte *ele*. Othelana wawe waahimutapanya voomalela, ni mwamuthiyana mmosa aari mwaana a mwene mwaamukhaani, mwaana a mwene, Yesapeli. Ooreera saana omuweha, muthiyana ooreera saana, masi mmurimani mwawe aari ootakhala. Ni owo aari namaakokhorela amuluku a ethiru, ni aahimwiiriha Isarayeli othene. . .

⁴⁶ Vano, moota kaatthunaaka okwannya yeeyo minuutu vakhani paahi, hiyo okhala, okela muhina mwa yeela ya omaama, moone, vaavo. Nto mulopwana akhuma orowa othela; muthinto wa mwali, muthiyana owo. . .Ti yoovikana oweha oreera paahi. Muhaana okhalana mutthu, oophitaana munepa ni erutthu; mutthu vekeekhai onrowa okhala mpatthani anyu ni muxirikha, onrowa okhalela nthiti ni nyuwo khula okathi.

⁴⁷ Vano, masi, Akhabi, owo aaroosiveliwa ni owo mwaha wo wira aari ooreera paahi, wona waka, ni khuthela. Khiyaakhanle okhalaka etthu ekina ni yoowo, mwaha wa moota, owo aaryaawe ootakhala. Vano owo khurova vale. Vano nto, vekeekhai, ory’ene oovaraana ni yoowo siiso, khumphenta, vano, owo aahimwiiriha Isarayeli othene wira etampi ni okhala oonvirikanya Muluku, ni waapwexakasa altaari a Muluku; khwaateka altaari a Payali. Ni yaarina omukokhorela Payali wIsarayeli wothene, okathi owo.

⁴⁸ Vano, amwaar’awe yaahimwiiriha naxariya Napothi. . . Anci-ene a nyuwo moosoma sa yoowo. Moota owo aakunxaawe ematta awe, mwaha wo owoka; khulaphela, wootha, ni yaahikhalana anamoona oowootha envirikanyaka yoowo.

Okhala wira, owo aathuna owiirela etthu aiy'awe; ni khumwiiva mulopwana naxariya, wira akuxe ematta yaakhala waattamela elapo ya empa ya mwene.

⁴⁹ Sothene iya, Muluku aanweha. Tivo profeta, Eliya, yoowo aari murumeyi muulupale, oowerya a Apwiya, khulaleerya ni khimuleela Yesapeli etthu yaarowa omukhumelela. Ni khimuhimeerya Akhabi wira alapwa yaamurowa olata ephome awe. Vano, okathi Muluku onihimyawe etthu...Vekeekhai, mahiku ale, Masu oolukama a Apwiya yaarwa ni profeta.

⁵⁰ “Muluku, khalayi ni inamuna sinci-ene aahaalavuliha axitiithi ni moolumo a maprofeta, nihiku nla nookiserya mwa Mwan'Awe, Kristu Yesu.”

⁵¹ Tivo, *Ala* Masu. Nto etthu p'itthu yavirikana ni *Yaawo*, muhiye mmansaya. Munnona? Vano, vaneili, Owo onlavula olelo ovira mwa profeta, namoona, ni sikina. Masi yoopacerya *t'Ila*, Masu. Vano...

⁵² Nto Akhabi aahiira yootakhala ela. Vano owo khukelela ohoolo; Muluku aahaareeriha atthu mwa miyaakha sinci-ene. Nto, vookiserya, Yehosafati aari mwene a Yuta, okathi Akhabi aary'awe mwene a Isarayeli.

⁵³ Vano, nto, Yehosafati aari mulopwana naxariya. Owo aari mwaana a Asa. Asa aari mu—mutthu naxariya, vano owo aahaapwexakasa altaari othene a—a amuluku a ethiru; khwaateka altaari a Yehova. Nto awo akhalanaka mu—muhakalaliho, p'uhimya wene, oYuta.

⁵⁴ Vano nto nuvira okathi vakhani, Yehosafati, ahiiso Akhabi kiireke, aahiruma, ni owo aahiphwanya wira ekapatti ekina ya elapo, oSiriya, uupuwelaawe wira yaari yawawe, uupuwenlaawe wira aamurowa okuxa. Tivo owo aahimukoha Yehosafati sintoko aanitthuna orwa ni opaka mwaataano ni yoowo.

⁵⁵ Ni, tthiri, woorkhala woopiha wuulupale vano, moone, awo vamonalyaya mwene ola muulupale, Akhabi, iwe, ni awo yaahimoona ola muulupale nno, Yehosafati; mmosa aya, ookuttihiwa; mukina, mulopwana oosareya Erooho. Nwehe moota mumpakaanyu mwaataano anyu. Nwehe etthu eniiraanyu, moota muniitakaihanyu n'alipa-ooaamini. Mukhale ooloka, vanci-enexa nihiku minkhalahu.

⁵⁶ Miyo kinnaamini, ekereja, voohihoverya, wira ela ennivihaka vamurimani vaka. Mwaha wa yeeyo kinweherery'aka ohiy'ula mithanu, naanaano; wira emaara ekina-tho, ehinatthi wiiraneya, nivahe ekereja ela othokosa woomalela, mBibiliani.

⁵⁷ Hiyo ninkhala mmuuttutthini mwa okathi. Vaamuweryaneya wiiraneya okathi p'ukathi. Noonaka okathi ophiya wira itthu siiraneye; otakhala wene wa nwanani, owerya wene. Hiyo ninnoona ittheke iya s'etthapwe ni sothene siiraneyaka, iretta iya sothene soohiyana-hiyana. Sothene

iyo sinkumiheriwa ni ihiyelo iya, soompwaka misika iya ni itthu siiso. Awo anootepanya voomalela itthu nno. Ni awo anootepanya elaporatooriyu yuulupale ya Muluku, wira emaliherye Masu Awe. Enoorowa wiiraneya.

⁵⁸ Tivo, “mutthu a etampi” avenyaka, owerya, oowootothaxa. Wulu. Koomwiiwa murumeyi mmosa voosiis’ula, mulopwana mmosa oosareya Erooho, akuxaka ekanyeryo ya nxeni ni ahimyaka wira Nwanani a Kristu aari Ruusiya. Ovonya xeeni. Uh-huh. Ruusiya khorina-vo etthu. Nnari, mulopwana. Eyo ti Yoolempwa. Vano, masi nwehe okathi ula muulupale onkhalaahu, olopoliwa.

⁵⁹ Vano, Yehosafati ola, oonaka ntoko okhala saana okhala wira mwene muulupale a Isarayeli iirale, “Murwe, mukithotole.” Ni owo khurowa iwe. Vano awo khukuxa inyompe ni ipwittipwitthi, ni siiso, khuvaha mukuttho. Okathi wothene, mmurimani mwa Akhabi mmwe, owo aari namawoka, okhala wira owo khaakokhorela eyo. . . wala ovaha ipwittipwitthi iye ni itthu ni murima wa xariya, okhala wira, tthiri, owo aalipanaxa etiini ya amwaar’awe.

⁶⁰ Ni nwehe, siiso ntoko Akhabi aamuthenly’awe Yesapeli okathi ole muulupale w’epiphi wa Isarayeli, owo aahiruuha waakokhorela amuluku eethiru wIsarayeli, ethoonyeryo y’ekeekhai ya olelo. Okathi ene yoowo w’epiphi; naakhumaka ni arummwa oopacerya, emaara yaneili, emaara yaneeraru, mpakha okela okathi w’epiphi, miyaakha ekonto emosa ni imiya thanu. Siiso ntoko Akhabi aamuthenly’awe Yesapeli khuruuha waakokhorela amuluku a ethiru wIsarayeli, siiso ekereja ya Erooho Yoowaarya yoothelana ni ismu, khutthikela oruuha waakokhorela amuluku eethiru, nto olelo owo mukhalelo w’oKristu. Munnona? Munnona, voorii pelaxa. Nto vano eyo eheetta mpakha vathi, khula nihiku; khula okathi wa ekereja enimweetta erowaka vathi mpakha etthu ene yeeyo, mpakha emalelo yuulupale, mukhalelo wookuttihiwa onimoorwa, Okathi wookuttihiwa wa Ekereja ya Lawotiseya. Oh, okathi xeeni woowoopiha onkhalaahu.

⁶¹ Nwiriyaane. Kintthuna kihimye vaava, kihinatthi okelela ohoolo. Miyo ka mulaleyi a enamuna ya khalayi onlipelela woona-tho mahiku a khalayi. Miyo nkinreereke woona sa etakiheryo ela, Hollywood okuxaka murima Ehapari yooreera, mpakha vankhalaaka oophweeleya ni yeeyo. Ayo, mulopwana. Kintthuna woona enamuna ya khalayi. Miyo kinnoova wira ninkhaliha oKristu wooreeraxa w’atthu; eliinya ya woopiha.

⁶² Vano, Yehosafati onoorwa, onuupuwela, “Oh, ahe, mwene ola muulupale a Isarayeli, miyo paahi kino. . . Oh, hiyo nno. . . Sothene sinookhala saana.” Nto varyari vene wo okarya nno wothene wuulupale, owo iirale exeeni? Owo aapanke mwaataano, wira arowe awanane nwanani, ni iphwanyeryo

imosaru, okhala wira awo yiirale, “Hiyo oowaili n’athu amosaru.” Masi awo khayaari. Nimosa naari nikhuru noosareya Erooho, nikina naari nikhuru nookuttihiwa. Awo kahiyo athu amosaru. Nnari, mulopwana. Khimukhanle okhalanaka . . .

⁶³ Epiphi khekhanle opatthanaka ni waarya. O—ohiyu khokhanle okhalaka ohoolo wa waarya wa nsuwa. Nto okathi wowootothaxa okhanle, onkhala eriyari ya okathi. Vekeekhai nsuwa naatupweelaka wala naakhumaka, p’ukathi wowootothaxa okhanle. Khiyaavo eyoonelo yoophiyerya wira moone oratteene; maluuxu vakaaroni vanyu khanrowa wooniha vooreera ni vowooneya. Vanreerela ekhaleke epiphi wala waarya. Yesu ohimmye wira, “Mukhale ooviha wala ooriiry, kahi ookuttihiwa.” Tthiri, eyo eliinya yowoopiha.

⁶⁴ Vano nto Yehosafati, varwiiyaawe, nto mwaataano ola muulupale waahipakiwa, yoowo wahaamusivenle Muluku. Nto nwehe, okathi ene yoowo wa yawawe, evitikavitika yothene vano, “Koophwanya ocaliwa ni mwene ola. Nto, oh, miyo—miyo—kihaana opatthana ni namwaattamanani ola. Kihaana . . .”

⁶⁵ Moone, mwiipasoope, ni yeeyo, ekereja. Munnona? Ti yeeyo entannya mulattu wothene varyari va etapernakulu ila va, ni mwa sikina. Munnona? Mwiipasoope mwaha wa etthu muniitakanyu. Munnona? Mukhume naanaanoru, ni mukhale wa Kristu wala mukhale oomuvirikanya Yoowo. Munnona?

⁶⁶ Vano, mutthu ola aahipaka mwaataano, ni uupuwela wira iirale etthu yuulupale. Nnakhala vo, okathi owo iiraly’awe, “Khokhanle vale vano, nihinatthi orowa, naahaana waakoha Apwiya yeela?” Vano, Yehosafathi aahikhalana etiini yoophiyerya yaahanle mwa yoowo, mwa ovonya wawe, mpakha owo aaronwaawe iwe wa mwene ola, masi owo aahikhalana etiini yoophiyerya yaahanle mwa yoowo wira uupuwele, “Ahe, hiyo naahaana mano waakoha Apwiya.”

⁶⁷ Vano, Akhabi aamutthikela akelelaka ohoolo ahihimmye hata nuulumo; enamuna awe paahi ya mekaanika, ya erutthu, ya omutthu yo wira itthu.

⁶⁸ Miyo kinimwiikoha tu va, ekereja, vakhala wira eyo khenkhalaka, imaara sinci-ene, wira hiyo ninnivonya. Otthokelela, ni wira, “Ahe, yaahaana okhala enamuna *ela*,” vano hiyo ninkhalaha eyo siiso.

⁶⁹ Miyo kinoona wira ti vaavo yinci-ene ya elaleeryo ya wAmerika olelo, hiyo nikhalinhe ahu mwa enamuna ya—ya, kaamuhimya wira, elaleeryo ya oHollywood, vasulu va ekuxelo murima. Hiyo ninniweha wira namalaleya a ehapari onimoorwa vaplataforma, olelo, ni, wulu, owo othene t’owiipelana, ni onoohimya iperwa sinci-ene ohinatthi opacerya olaleya, ni itthu siiso, ni wiiseettiha enamuna yoopwapweleya ni wira ntoko

mulolo, vapulpitu. Waphiya okathi wo wiitthana waltaari, athu hata khaanoa exariya wira ni yeeyo yiitthane waltaari. Ti yeeyo. Mwaha wa yeeyo olumwenku okenlyaya mmukhaleloni wookuttihiwa olelo, yoowo oryaya-mo.

⁷⁰ Miyo kinniikoha, olelo. Ti yeeyo, olelo, miyo . . . Ekereja, hiyo ninniphavelaka waaroiha amiravo ahu oxikola, wira yaxutte pisikoloxiyya, ni sikina siiso, wira asuwele moota wo opaka epokrama, wira aphiye vapulpitu ni otthokiha yawihu . . . Mutthaka okhale wookuxa murima saana, wira waaphwanye athu, ni waavara murima. Ni anci-ene wa anapisikoloxiyya anookhuma ntoko mapurosoore siiso, ni otepiha ni otakiha itthu sinci-ene. Nto miyo kinniikoha paahi, okathi awo . . . wira . . . Hiyo okathi wothehe ninihimya oreera ni ovara murima wa ekereja. Masi hiyo ninoovonya waahimeerya, “Ole onthuna okitthara, aikhootte mwaneene, akuxe mwiikimanyo awe, akitthareke Miyo.” Miyo kinniikoha sinto khaninkhalihaka oreera wa ekereja vooreeraxa, wa mutthu onkela.

⁷¹ Mwa nlikanyiho, ekereja Patista olelo yookhalana yoohimya, “Emilyawu ekina mwa 44,” yaakupaliki mamempuru ikonto sene, ni ikonto miloko sene, oohirukunxeya murima, athu paahi ankela ni wiitakaniha mukereja. Ni iwo olokihiwa wa Ekereja ya Yesu Kristu, mwaha wo waakupaliki mamempuru awo. Awo nlelo anniwurya. Awo nlelo anninvura sikaro. Awo nlelo annimuttikha cuuku. Awo nlelo annootha.

⁷² Awo anoorwa okereja, ewehereryaka orukuneihiwa nnikhuru na anamalaleya a Hollywood anvenya, anoothererya ekaryelo yinci-ene, ni ikaruma suulupale sinci-ene sinipwehiwa epantte ni epante ya plataforma.

⁷³ Nave, yaahaana okhalana wiitthana waltaari wa enamuna ya khalayi, voopacerya ni Muluku, evekelaka vale; vaavo alopwana ni athiyana ahinrwaaya okuxa murima, wala otthimaka ni wira ntoko naperwa, masi okokhora waltaari ni osuwela wira okhwa wa Yesu Kristu vale, aakhwenle yaawo, wira awo anoothikela okhala-tho naxariya ni Muluku.

⁷⁴ Miyo kinniikoha sintoko khaninkhala enamuna yeeyo ya okathi, okathi onaakuxahu anamalaleya aalupale, ntoko anci-ene anviravira ilapo olelo, anamalaleya ehapari oosuwelaxiwa asomme pisikoloxiyya ni waakuxa murima athu waaruuha okereja. Masi vammalaya waakhalana mukereja, vano anrowa wiirihiwa exeeni? Exeeni—exeeni enrowa waakhumelela vammalaya okela mukereja? Anitakanxa mukereja paahi, ni anthhika ni etampi emosaru ni otthuna omosaru awo akelanne aya mukereja. Awo anthhika siiso. Nto mwaha wa yeeyo, olelo, olumwenku onwehaaya, ni wira, “Ahe, vakhala wira mulopwan’ole ookhalana etiini, vakhala wira mutth’ula ookhalana etiini . . .”

⁷⁵ Kinnoova wira hiyo ninkhalaha yookweyaxa. Ti wii, miyo kinnimpenta. . . Miyo kinoona wira, ohakalala, vekeekhai, kinnaamini wira ohakalala wothene oniheliwa mwa Yesu Kristu. Ti yeeyo. Kookupali wira ti yoosiveliha ni yootteeliwa murima. Masi muupuwele, munna, ephiro ya oluwela ni ohaawa ni mwiikimanyo. Nyuwo muhaana osuwela eyo, nave. Ti yeeyo. Miyo kinniikoha vakhala wira khanimpintarixaka—ni mukhalelo wookhweyaxa.

⁷⁶ Ntoko, miyo kaanweha, nto amwaar'aka khuhela. . . Miyo kipacerya, vano awo khuhela nluwa vakasakoni vaka voosiis'ula. Awo khwira, "Mwaahaana owara. Ame anyu akumi."

Nto miyo khwira, "Oh, oophentiwa, nkisuwenle."

⁷⁷ Nihiku n'Aximaama ti nooreeraxa, masi eyo eri ntoko olumwenku, awo ankuxeryaka nakoso etthu ene, wira paahi atumiheke maluwa ni itthu siiso. Vano, iwo ohimukupaliha maama. Vano, ame aka ti ame aka khula nihiku na mwaakha, ayo, mulopwana, kahi nihiku nimoso paahi.

Miyo kinimwiira, "Nyuwo munnaaphenta ame anyu?"

⁷⁸ "Miyo kahaaveleeliha ehupu ya maluwa Nihiku n'Aximaama." Ahe, munna, owo aahaana okhala maama khula nihiku. Masi ti ya nakoso.

⁷⁹ Nluwa nle ti nooreera. Miyo okisivela nluwa nooreera. Miyo kinuupuwele eyo enamuna emosaru miyo. . . Moota nluwa nireeralyaya. Nlo ninoophuwa. Ni nookhalana eyinkhelelo. Ni ole onvira vakhiviru onnoona wunkhela. Mwaamunama onnaattamela ni woona wunkhela. Masi, vano nwehe, ti nooreera. Ntoko Ekereja ya Pwiya Yesu Kristu, Nye etthu yoovuwaxa; Ovonihwa wa Muluku, ni owerya, ni mitikiniho, ni ithoonyeryo, ni miiriirya, ni otaphuwa mwa etampi. Nlo nipuro nooreera. Masi, nwehe, vakhala wira ethutu iyo. . . Nihaana orwa, Ekereja, ntoko ephattu yothene.

⁸⁰ Ethutu iyo, eryeene yooreera, khula enyompe mulaponi yaamulata yaawerya vale. Masi ephattu yoovaherya ipaineeti sikhani, mavaka makhaani aniihela vaavale, aniihaniwa miiwa, vano iyo khasinkwannya. Eyo ennikhapelela. Eyo ekeekhai.

⁸¹ Ni kinoona wira, olelo, naahikhalaneru Masu a Muluku, oowiithaxa onvikana xoowa oniitha ninno-ninno, orukureryaka oreera wa owerya wa owaarya wa Muluku, ninoorowa ohiya khula enyompe mulaponi olata ni othanla. Waamuhonona Owo. Onookhala olokihiwa wa Ekereja. Ti yeeyo.

⁸² Kinoona wira, olelo, enthunaxaahu arumeyi anci-ene oowiitthaniwa ni Muluku, a enamuna ya khalayi, oolipa murima, khino oohisomaxa, masi anaaruha atthu waltaari, nto weiwo oluwela. Kahi ni ohakalala ni atheyaka, ni enyamunyaka exuwinka, n'uhela nsina naya vapapheloni; masi, munna, wunla

wa khalayi ni okhwa, mpakha alopwana n’athiyana ottharuwa voomalela itampi saya ni omwaattamela Muluku. Amen.

⁸³ Miyo kinimooleelani, hiyo nihaana, “Nvenxe matata, ale anthuna omukupali Kristu,” sothene siiso. Eyo eri saana, munna, masi eyo kheni—eyo khenikumihya etampi.

⁸⁴ Nyuwo muhaana orukunxa murima toko, wiittharuxa, okokhora vale ni wunla vekeekhai. Kinniweya wuupuwela okathi atthu a enamuna ya khalayi yeettakaaya munvireloni, ni nno nno mphironi, ekhuwelaka, ni alavulaka n’anamwaattamanani aya. Awo yaari aKristu a mahiku ale; yaahimeeryaka itthu sa Apwiya.

⁸⁵ Nto, olelo, hiyo ninhela nsina nahu muliivuruni mwa ekereja, n’ukhuma n’ukhala owaani, ni ohihimya hata nuulumo na Yeeyo. Oohicaliwa. “Vakhalaru wira hiyo nniira mpantta wa ekereja, vaareera.” Kookupali wira hiyo ninoovonya vo, atthu. Nwehawehe. Tthiri, eyo khenrowa okhala efayita moolamuliwani. Nnari, mulopwana. Khenrowa.

⁸⁶ Hata etthu, “Ole onrowa okitthara Miyo, aikhoote mwaneene, akapatte mwiikimanyo awe, ni akhweeke khula nihiku.” Akhaleke ookhwa, vamwiikimanyo vale. Eyo ekeekhai. Oluwela! “Ephiro, miyo kinookuxa ephiro,” nyuwo munniipa, “n’ale vakhani oothanyiwa a Apwiya.”

⁸⁷ Miyo kinoona wira olelo, okathi xeeni onkhalaahu! Eyo, onamalaleya, owo oniheliwa ni mithuko suulupale soowaarya, ni oneereriwa. . . Mwaamoonaka namalaleya a ehapari yooreera orwa mpooma, munimwiikoha. Miyo, mithukumano saka sinnitthekaka mwaha wa yeeyo. Eyo ekeekhai. Miyo kinniikoha taani onrwa mpooma, imaara sikina, namalaleya a ehapari wala Yesu Kristu? Vano, awo aakhalana. . .

⁸⁸ Miyo kaahirowa nipuro nimosa nno, woohikhala khalayi, vaavo namalaleya mmosa aarowaawe orwa. Nto Nsina na Yesu. . . Vano, awo yaahikhalana elatarato ya namalaleya, “mutthu a okathi,” mutthu ni *ela*, ni mutthu ni *ele*.

⁸⁹ Miyo, imaara sikina kinuupuwela muteko aka, ni kinniwoona atthu orwa. Nto miyo kaanvolowa okatthi mwa oteeli, wira, “Muluku, taani—taani atthu anrweelaaya omoona, miyo wala Nyuwo?” Munnona? “Awo jaarwaaka okoona miyo, awo aapweteya, nlelo; masi, O Muluku, mukimoroxe, mukikumihya. Kintthuna koothoonyeryeni Nyuwo, Ole onrowaahu okhala ohoolo Wawe nihiku nlo, ni matata oothukumela ni nithukumelaka, erutthu yootteetheya, noowehakani Nyuwo. Kisuwelaka wira munep’aka onttariha ni olamula Wanyu.” Nrowe nimuttotlopele Kristu.

⁹⁰ Olelo, nyuwo muniira, “Ahe, kiniira mpantta w’aPatista. Miyo ka Mmetotista. Miyo kiniira mpantte wa etapernakulu. Miyo kiniira *ela*.” Oh, eyo kherina naata n’iyo; kahi etthu. Kinnihoverya imaara sikina.

⁹¹ Nno woohikhala khalayi, miyo kaahoona e—elaleeryo epharihiwe, wira ekampaanya emosa yaamoorwa mpooma. Ni nuulumo na mulopwana, nsina na mulopwan'owo ni ileetera suulupale saana yaarowa epannte aya, *siiso*. Nto vathi vaya, vaniveruni nikhaani, naahimya wira, “Yesu Kristu mmosaru nsana, olelo, ni mahiku othene,” vathi saana vaniveruni. Munnona?

⁹² Awo yaarookumiha owaarya wothene mwa Kristu, khuhela mwa mulopwana mmosa, wala ekereja khata, wala mutthekenso khata. Munna, kinimooleelani, nyuwo munoowerya ohiwiirani etthu ni ekuxeryo murima, onaperwa wa Hollywood, *siiso*, mwa...ni ekereja. Masi, Ohoolo wa Yesu Kristu, Owo ti Ole onvuwihiwa. Ti yeeyo. Vano, eyo ekeekhaii, munn'aka oophentiwa mulopwana ni muthiyana.

⁹³ Muhikinanareele. Muupuwele paahi wira kinimoolaleeryani. Miyo kintthuna kilaleye ntoko wira ti elaleeryo yookiserya kaarowaaka olaleya mwa ekumi aka. Kintthuna kilaleye, khula mutthaka onlaleyaaka, ntoko wira kaari mutthu onihalela okhwa aalaleeryaka atthu anihalela okhwa. Nto, miyo ka yoowo; waarya waka onoottipha, khula nihiku; wawinyu, nave. Ni hiyo n'atthu ninkhwa ooluwela. Nto hiyo nihaana okumana ni Muluku mukumi, nihiku nlo, ni vanreerela nikhale mwa exariya voowiixerya wa yeela.

⁹⁴ Mookuxani murima paahi, ni wira voohiloka, ni wiitakaniha mukereja, ni orowa *nno* ni *iwe*, wira enamuna *ela* ni enamuna *ele*.

⁹⁵ Vanreerela nikhilane mithukumano sa mavekelo sa enamuna ya khalayi mmawannyihu, ni okhala ninvekelaka Muluku, othana n'uhiyu. Nihiku nri vakhiviru, “okathi w'oriipiwa murima, okathi w'oxanka.” Bibilia ohimnye wira, “nihiku n'epiphi.” Nto hiyo ninkhala mwemmo.

⁹⁶ Moota mulopwan'ola muulupale aakhuruwenly'awe vale ni ohakalala. Owo aaitakanxale ni ookuttihiwa, n'ale a mmukaanoni, ni uupuwela wira aapaka etthu yuulupale, uupuwela wira Muluku aammureeriha. Ni ahisuwelaka wira okathi ene yoole aaruuha nikhuru nla nothene ni yoowo. Exeeni? “Nikhuru nahu naamukhaani, na—na Yuta osulu nno, naamukhuruwela niitakanxe ni makhuru maalupale a Isarayeli. Nloko xeeni noowerya ninrowahu okhala.”

⁹⁷ Eyo eri vo. Nto eyo ti enamuna ene yo woototha xetwani onrumeelawe naanaano va, wira amuruuhe nwanani a Kristu; vekeekhaixa ntoko seemenly'aka mwa yeela. “Ninrowa otakanxa wiilipiha wahu.” Khanikhanle wiiraka yeeyo. Vanweryaneya sayi anli weetta vamosa, ehiwananaka?

⁹⁸ Estadu Unido ula apakaka emosaru, musuwelelo mmosaru ni ovonya omosaru, okathi yiiraanne aya ni Ruusiya ottuli wu. Okathi ole awo yaahalela olikana wira akhalane ekhotto, nto khwiiraana ni Ruusiya. Nto vano munnoona etthu erinaahu,

khamunoona? Awo aakhalana matteeke ahu ni isiiri sahu sothene, ni ikapwitthi sahu s'atomu ni itthu sothene siheliwe iwe, wira aniphutulele. Etthu emosaru ennitthara ya erooho.

⁹⁹ Nto hiyo ninniphwanya, Yehosafati waamanlyawe opaka mwaataano ola, ni khuveka miruku. Vano nwehe, nwehe olumwenku epantte ya ota, owo khwira, "Vekeekhai, hiyo nookhalana maprofeta oowaatta nno. Hiyo nookhalana eseminaariyu oosareya yaawo."

¹⁰⁰ Awo khurowa khwaakuxa atthu yiixuttihiwe, yaasuwela pisikoloxiia, yaasuwela yothene ya yeeyo. Khwira, "Murwe naanaano, nto hiyo ninoovekela ni ninaakoha Apwiya."

¹⁰¹ Othene aya, vekeekhai, mwa muupuwelo aya w'erutthu woowiikuxererya, khurwa vale khwira, "Vano, nkawehani, hiyo . . . Rowakani. Apwiya ari ni nyuwo, ni Apwiya anoorowa woovahani ekapatti ile y'elapo osulu iwe, eyo, enrowa okhala yawinyu. Munoorowa waattikiha aSiriya. Munoorowa wira." Mmosa aya hata aahiipakela manyaka maalupale a yuuma, khupacerya otthimakasa so, airaka, "Ti siiso eryaya, munoorowa owoomola aSiriya."

¹⁰² Masi, Yehosafati, a erooho vakhani paahi, wira aakhulele ololo owo wa iperwa. Eyo ekeekhai.

¹⁰³ Muluku, munivahe-tho maYehosafati, yooceiye va ni iperwa iya sa Hollywood. Ti yeeyo, yoothereryaka, ekhalaka ntoko wira etthu ahikhanlyaya; ekhalaka ntoko, etepihaka, yoothaka. Vano nto yaakelaka, enkhalaniwa exeeni owo aakelaka? Ntoko onvekela mutthu, "rwaani murapelele mothakoni". Khiyaarowa okhala etthu woohikhala mithaaka vamuru vanyu, wira eruuhale mixankiho ohoolo waya.

¹⁰⁴ Vano nwehe, exeeni mukhanlyanyu waaruuhaka-mo? Muhano mmosa aahikiirela nihiku nlo, "Mulopwana mmosa iirale, 'Miyo kaamurowa okereja, masi exeeni—kaarowa ophwanya exeeni n'urowa okereja?' Khwira, 'Sothene awo siniiraya opaka yolya y'ohiyu, ni awo . . . ya *ela, ele*, ni *ekina*.'" Nto muhan'owo khwira, "Miyo kaakhanle oomaala, maana nkaasuwela nipuro n'omuroiha-wo." Eyo eri vo. Khwira, "Kaatthuna kaawenrye ophwanya ekereja ya khalayi weiwo waarowa wiipiwa masipo a enamuna ya khalayi n'ukhala vooreera murima."

¹⁰⁵ Aana aavoliwa etala, anrowa olya ele amphwanyaya mulaathani mwa ikokhola. Ti muteko wa Ekereja ya Muluku mukumi waalyiha Masu eekeekhai a . . . a Muluku.

¹⁰⁶ Iwe, okarya iwe wothene ni elolo, Yehosafati iirale, "Khakhanle-tho mukina?"

¹⁰⁷ "Mukina-tho?" khuhimya Akhabi. "Ahe, xeeni nyuwo omutthunaka-tho mukina? Hiyo nihaana imiya xexe wa axilopwana oolokaxa oothanliwa, oosoma, oolyihiwa saana,

oowara saana, akhanle mulaponi, yeemelanse va. Khula mmosa a awo ni mwiiwanano mmosa, ni murima mmosa, ni nsu nimos, yiiraka, ‘Murowe! Muluku ori ni nyuwo.’”

¹⁰⁸ Miyo kinniikoha sinto Estadu Unidu khakhanle asuwelaka etthu emosaru. Kinniikoha sinto Ekereja ya Muluku khekhanle esuwelaka etthu emosaru. Kinniikoha. “Ahe,” eniiriwa, “nkawehani, awo annikhalana muraarelo. Awo ankhallana mithukumano, suulupale soowunnuwa. Awo anaakuxa ikonto sene emaara emosa.” Masi miyo kinniikoha vakhala wira khokhanle-tho mmosa paahi. Kinniikoha sinto khekhanle etthu yoovirikana.

¹⁰⁹ Hiyo ninniphwanya wira, nookhalana atthu oorukunxa murima ikonto miloko miraru mwa isumana thanu na mosa, ni isumana thanu na mosa ohoolo waya khalinkhalana hata mmosa. Yookhala etthu ehilonke nipuro nlo. Eyo ekeekhaii. Ni yothene okuxa murima, woothererya. Olumwenku, mwaha wa etelevisawu, mwaha wa raatiyu, mwaha wa isineema, ni iviriho iye iwo, sohonona elapo ela n’ithiru ya Hollywood. Ti yeeyo. Sothene sinthuna okhala mookuxani murima wuulupale. Kahi yeeyo ekeekhai? Moosuwela wira eyo ekeekhaii. Hiyo kharina-tho etiini ya enamuna ya khalayi naakhalanakahu miyaakha sivinre. Okhala wira eroovololihiwa. Ninoophiyerya yeeyo, okathi vakhani paahi, munimoona.

¹¹⁰ Vano, elatarato xeeni yooreera, wala elatarato yootannya, kaamuhimya siiso. Nto va aahirwa Yehosafati ola, khwira, “Ayo, miyo kinniwona awo othene. Awo t’a, khula mmosa, aakhalana ikharawu saya,” ni etthu p’itthu yaakhanle. “Othene aya anrowa okhala maprofa, wala arumeyi aalupale. Awo t’a ikoleexiyu suulupale. Ni ti yothene ela. Awo t’a exikola yuulupale ya profeta, ni sothene. Awo othene arina mwiiwanano mmosa. Eyo ekeekhaii. Masi khokhanle-tho mukina mmosa paahi?”

¹¹¹ “Ahe, munrowa otthuna exeeni ni mmosa-tho, nave imiya xexe yiiwananaka emaara emosa?”

¹¹² Masi mulopwan’ole, vathi mmurimani mwawe, aahikhalana Muluku. Ni aanisuwela wira yaahikhala etthu yaavonyeie ya yeeyo. Ayo, mulopwana. Owo aahisuwela wira yaahikhala etthu yoowuntta. Mwaha wa xeeni? Mukihiye kooleeleni... Yoolempwa khenihimya yeeyo, masi va t’ile erinaaka. Miyo koosuwela wira—wira Yehosafati aahisuwela wira namirima miili ole vale, Akhahi, wira owo khaari ooratteene ni Muluku. Ni Eliya aahilaleerya Masu a Muluku wa yoowo. Ni vaaweryaneya sayi Muluku oreeriha etthu Owo aatakhalinhe-awe? Amen.

¹¹³ Miyo kinihimya etthu emosaru olelo, mpatthani. Ni Ekereja ya Muluku mukumi, enkhala yoororomeleya ni Muluku, enimwiira etthu emosaru. Khivanweryaneya otakanxa makhura ni maasi vamosa ni wiihana eyo woopowa. Khamunwerya. Muhaana wiivalaaniha, munna. Etthu ehaana wiiraneya.

Wakhala nrromelo ohanle, nihaana wira etthu, ni wira naakuvaka; maana, okathi wa Okuxiwa ori vakhiviru.

114 Itthu sinoothukumanyeya, sothene, ni ekereja eri ottaiwene saana. Awo annisoma inamuna sothene sa irevista, iliivuru, ihantisi, ni itthu sothene. Kaamuwerya orowa olelo wa e...Kinoowerya orowa okereja, ni kinoowerya wira, “Oh, akavi ansuwela...” Awo annisuwela khula nsipo, nuumala mmosa wa mihakalaliho iya suulupale. “Vano, exeeni—nikukhu xeeni nimphwanyaneya nsipo khata?” Awo annisuwela. Awo annisuwela taani okhanle. Awo annisuwela oniivaha wira akhale mukhulupale, ni t’ani oniivaherya *ela*, ni aratti akavi a isineema athelanne, *ela* ni *ele*, *ekina*. Masi, Masu a Muluku, awo khansuwela hat’etthu. Eyo eri vo. Tivo hiyo ninnaavaha ma-... Nto, nnakhala vo, anihimya okhala aKristu.

115 Ni atthu ankhalala oohittheke. Eyo enkhuma ottuli wa plataforma, ti weiwo enkhumaaya. Vekeekhai. Enkhuma ottuli wa plataforma. Awo animwaaxuttiha inamuna sothene sa irumelo ni inamuna sothene sa *ela* ni *ele*, ni mitthenkeso, ni moota wo opaka makhuru a amiravo, ni itthu sothene siiso. Miyo kinniikoha sinto enoolinwa. Hat’etthu ya nthowa ni yeeyo, masi miyo kinimwiikoha sinto eyo ti yoovekela ya Muluku.

116 Okathi, Yesu iiraly’awe, “Woohikhala wira mutthu oniyariwa ni maasi ni Erooho, owo khonrowa okela Momweneni. Ole onrowa okhala wa-...ontthuna okitthara Miyo, aikhootte mwaneene, ni s’opuha sawe sa molumwenkuni, akuxe mwiikimanyo awe, akitthareke Miyo.” *Mwiikimanyo* ekanyeryo ya “okhwa, oluwela.” “Ole ontthuna okhala muKristu, airule mwaneene miyuupuwelo sawe. Airule mwaneene miteko sawe. Airule mwaneene sothene, aikhoottaka, ni akapatte mwiikimanyo owo wooreerihwa, ni akitthareke Miyo khula nihiku. Ole ontthuna okitthara Miyo, aire yeeyo.” Ti yeeyo Yesu ohimmyawe.

117 Masi, olelo, hiyo niniira, “Atthu othene aviriheke okathi wooreera. Atthu othene yoopeke ikuphwi. Atthu othene ekhuweleke ‘Aleluya!’ Atthu othene yiireke *ela*.” Oh, moota hiyo orinaahu nikuttha na onyakulihana! Amen. Muluku... Hiyo nihaana masipo ala a naanaano ni wiipa voowaakuva saana, enikhalaaya wira ninrowa ovira muxirini nitthimakaka ni yaawo, wala etthu siiso.

118 Nave, miyo kinoona wira, naakhanle niipaka *Vakhiviru*, *Muluku Aka*, *Wa Nyuwo*, yaamukhala yooreera saana wa Ekereja; masipo a enamuna ya khalayi.

119 Ankuxiwa atthu anci-ene a nikhuru no wiina, mmiravo munikhuruni mo wiina, nsana ohiyu, nto olelo ohiyu va arumihaka mukereja ya Muluku mukumi? Ti yoonanara vamaithoni va Muluku. Mulopwan’owo awehiweke, toko, ni

ooniherye mihokorokho, sikhhanle soorukunxa murima, wira ooniherye wira ori oratteene ni Muluku.

¹²⁰ Awo anooruuha olumwenku wa jazz mpaani mwa plataforma. Awo animuruuha Hollywood, olaleerya wookuxa murima, vaplataforma.

¹²¹ Vano, nkaaphwanyaneya opooma wanyu yooreera, isumana vakhani sivinre, oLouisville, Kentucky? Ennikiwereiha murima, okathi awo othene yaakilaanthe-aya vale, atthunaka woona miiriirya sa Muluku; nto mmalakarū olaleya Ehapari yooreera, awo anoosarihiwa voomalela, muhina mwa esekuntu emosa, nto anoorukunuwa ettuli aya anookhuma mpaani. Vekeekhai. Awo khandthuna Eyo. Mirima saya ti soolipihwiwa. Anookhuma; ni anci-ene aya, maPrustante, nave, anrowa ikereja Prustante. Masi awo yaahinto osarihiwa . . . oosarihiwa voomalela ni ekuxeryo murima ni sothene siiso, sa elolo ni onamukerejani, mpakha ahinsuwelaaya hat'etthu ya Erooho ya Muluku mukumi. "Yooneyaka ntoko oothunku, nave akhoottaka Owerya waya nave."

Nihiku xeeni ninkhalaahu. Nkawehani vatthu eyo enthukumanyeyaya.

¹²² Yehosafathi khwira, "Miyo koosuwela, Akhabi. Awo ari vo alaleyi anyu imiya xexe. Othene aya atthu oophwaneliwa, khula mmosa oowara ni maihi aya oovasiwa vooreerela, ni sothene, enakhaleru exeeni-tho aryaya. Awo khino aakhalana D.D. aya. Khino aakhalana inamuna sothene sa ikharawu. Awo khino annisuwela Soolempwa, okhuma A mpakha Z. Masi khamurina-tho mmosa, nipuro nlo? Khokhanle-tho mmosa, nipuro nlo?"

¹²³ Owo khwira, "Ayo, ookhala-tho mmosa, masi miyo kinnimunyokha." Eyo vo. Eyo vo. "Miyo kinnimunyokha." Muupuwele, Akhabi aari mulopwana mmosa natiini, ni ala yaari awiixuttithi anatiini, masi awo yaanimunyokha mulopwan'ola aarina Ekeekhai. Khwira, "Miyo kinnimunyokha." Khwira, "Owo kweekwe onookipwapwela mwaha wa etthu." Owo aarowa owerya sayi ohiya wira yeeyo, okathi Masu a Muluku yaamulamunly'aya?

¹²⁴ Munwerya sayi nyuwo omaala muryeene mulopwana a Muluku, wala muthiyana a Muluku, ni osuwela ni woona etampi ni itthu, soothukumanyiwa ni soophimmwa, ni sothene siiso; ni woona minepa s'atthu sirowaka omooroni; imilyawu sene khula nihiku; ni okhala oomaala? Khamunwerya wira.

Ookhala aakiirende nihiku nlo, khwira, "Munuupuwela wira munoowerya weemexa?"

¹²⁵ Miyo khwira, "Nnari. Nkinwerya weemexa, okhala wira Muluku oohimya. Masi nihiku nimosa, Opwaro wo Olamuliwa, awo anoorowa okuruxa eteela yuulupale, atthukuliwe kaamera vale, ni efiita ele ekaravariwe enoorowa orumihiwa. Ni miyo kinimweemela kiiwe ela; kintthuna kiiwe nsu naka

nilopolaka yeela. Muluku onookiphuka miyo nsu naka narwaaru kipwapwelaka yeeyo.” Ayo, mulopwana. Noonaka ekumi ela, nloko nla, nikhaliwaka-tho iwe woolamuliwani. Vekeekhai. Hiyo ninkhala okathi wowoopiha. Nto eyo eri vo.

Ni hiyo ninnimoona owo wira . . . owo iirale, “Khokhanle-tho mukina?”

¹²⁶ Owo khwira, “Ayo, masi miyo kinnimunyokha, maana kweekwe onkilaleerya sootakhala miyo.”

¹²⁷ Owo okhanle ohiyaka sayi olaleya itthu iyo soolipa, owo oonaka eyo yiiraneyaka? Moone Akhabi akhalaka ntoko saakhalawe ni airaka ntoko owo siiraawe, ni aaruuhaka atthu ntoko awo saaryaya.

¹²⁸ Vanweryaneya sayi mulopwana a Muluku, wala muthiyana a Muluku, ohiya okhuwela ni opwapwela etampi ipantte sothene? Okathi, awo aniwoonaaya alaleyi ala ookuttihiwa, ni ookuxa murima, ni anamasomiha, ni sikina siiso, yaahiyaka atthu orowa omooroni, imilyawu sene, vathi va wootothiwa; anci-ene . . . hata mw’atthu a osantu. Miyo nkinlavulaxa sa aMetotista ni aPatista, ni itthu siiso; awo aakhalana, nave. Masi eri mmakhuruni mwanyu.

¹²⁹ Wulu, arwaaka vaplataforma, ntoko itthu sothene sikina masi woohikhala ntoko aKristu, ekhalaka ntoko sothene sikina, mwa ilapo ni itthu, nto awo aniihana eyo “etiini.” Eyo etiinii, masi eri ottaiwenexa wa ephiro yoowoopola ya Apwiya. Eyo ekeekhaii. Awo ari n’atthu mwa enamuna nikhanyaya nikhuru nuulupale paahi n’atthu oowuukhuwa. Vano omalakaruu wuukhuwa iwo vakhani, nto, vanoosuweliwa wira khivanweryaneya ophwanyiya hata mmosa a awo; ekereja ti yoohikhala etthu. Munna, mutthu aamphentaka Muluku, owo onookhala vakhukuluni vawe mukereja, okathi wothene. Owo khokhanle okhalaka ottaiwene wa yeeyo. Eyo ekeekhaii.

¹³⁰ Vano nwehe, minuutu vakhani paahi. Kinoophavela waakuva, olukama nipuro nene vano, okhala wira okathi aka onoomala.

Nwehe, nto owo khwira, “Khakhanle masi mmosa-tho?”

¹³¹ Owo khwira, “Ayo, masi miyo kinnimunyokha. Owo kweekwe onlaleerya akipwapwelaka. Owo onikihimyanaka itthu soonanara.”

“Vaareera,” khwira, “mmurowele.”

Owo khwira, “Nsina nawe ti Mikaya.”

¹³² Masi mulopwan’ola aahikhalana etiini yoophiyerya osuwela wira atthu ala khiyaakhanle oratteene.

¹³³ Ni khula mutthu otonko okwanyyiwa, vakhani mano, ni Erooho ya Muluku, onnisuwela wira itthu iya, seiyo sinihaniwa oKristu olelo, khasikhanle oratteene. “Khimukhanle ophentaka

olumwenku, wala itthu sa molumwenkuni. Mwaaphentaka, ophenta wa Muluku khokhanle mwa nyuwo.” Bibilia ohimmye siiso.

Vano nkawehani. Owo khwira, “Mmurowele.” Vano awo khurowa.

¹³⁴ Vano nto owo khumuruma namitthaka mmosa mwaamukhaani, tiyaakono a ekereja, khino, wala mutthu siiso, khurowa iwe khwira, “Vano nkawehani, Mikaya, ninrowa wooruuhani nno ohoolo wa Akhabi ni Yehosafati. Vano, awo oowanli amphwanyaneya weiwe, ni awo atthu aalupale vano. Awo awiixuttihi ni asomi. Ni awo aakhalanasa ikharawu saya, ni sikina. Ni khula emosa wa iseminaariyu sahu, khula emosa wa ikereja sahu va, siri ni mwiiwanano woolikana wira nno otthuna wa Apwiya. Vano, nyuwo muhimye etthu emosaru awo anihimyaya, nto, miyo kinimooleelani, nyuwo munrowa owara vooreera ni weettiha ekaaro Cadillac. Miyo kinimooleelani, nyuwo vekeekhai munrowa okhala mutthu muulupale mwairaru yeeyo. Ayo, mulopwana. Munookelela ohoolo.”

¹³⁵ Mikaya khwira, “Siiso Apwiya Muluku akhanle akumi, miyo kinoohimya paahi ele Muluku orowaawe ohimya.” Amen. Ayo. Oh, vale ori mulopwana onikisivelihia. “Khino kihaana okhuura mukatthe ni maasi,” yeeyo aakhuuralyawe, “mwaha wo wira yeela.” Khino nyuwo munoomaniwa nlatu nimosa wala nikina, enakhaleru exeeni-tho owo aahimmye ekeekhai ni aaheemererya. Muluku aahilipiherya wira eyo Ekeekhai. Owo khaari oosuweliwa saana, masi owo aanimusuwela Muluku.

¹³⁶ Khimuruuha Mikaya mutokweene iwe. Owo khwira, “Vaareera, Mikaya, munihimya exeeni ya yeela?”

¹³⁷ Owo khwira, “Rowakani. Rowakani.” Khwira, “Rowakani, ni murettele. Mukeleleke ohoolo, mureeriwe, ti yeeyo entthunaaka wira mwiire. Masi koomoona Isarayeli ntoko ipwittipwitthi, soohikhalana makampusi, vantumuxani, soomwaramwareya. Ti yeeyo,” owo khuhimya.

¹³⁸ Nto vairaly’awe siiso; nto Akhabi khimurukunuwela Yehosafati, khwira, “Kooleenleni exeeni? Santu ule oophirikeya. . .” wala, zeeni, kileveleliwe, wala, etthu p’itthu; mmirav’ole khwira, “Wira. . . Kooleenleni exeeni? Mulopwan’ole aarowa okilaleerya yootakhala paahi—yootakhala. Kaahimmyeni? ‘Owo aarowa olamula paahi ekereja ahu, ni waalamula arumeyi ahu, ni olamula enamuna ahu ya etiini.’ Kooleenleni exeeni? Owo aamwiira. Miyo kinnimusuwela. Kaanaasuwela atithi awe owo ohinatthi.” Amen. “Kaanaasuwela atithi awe owo ohinatthi.” Uh-huh, ayo, mulopwana, mutthu eekeekhai a Muluku. Khwira, “Miyo kaahisuwela wira aarowa ohimya yeeyo.”

139 Vano nto owo khwira, “Ayo,” khwira, “Koomoona Isarayeli ntoko ipwittipwitthi, soomwaramwareya, sihirina makhampusi, vantumuxani.” Vano nto owo khwira, “Miy- . . .”

140 Vano nto mmosa w’atthu ale yaarina manyaka maalupale, aarowa osusiha ni ntata, mulaleyi, khurwa khumpurulela Mikaya apantte aya, khummana voowiilipiha owanoni ntoko saaweryawe, khwira, “Mpantte xeeni eronwaya Erooho ya Muluku okathi Eyo ekikhumaly’aya? Mwaasuwenle-ene.”

141 Khwira, owo khwira, “Mulipelele mpakha nyuwo muheliwe mukhatteya nno, nto munoosuwela epantte xeeni Eyo eronwaya.” Eyo ekeekhaii.

142 Mulipelele mpakha Ruusiya ophwanyaneye ota nno, axintte ilapo n’itthu siiso, ni elapo ela, mwaha w’otthikela waya ottuli, nto munimoona ele yaari yooreera ni yootakhala. Ti yeeyo. Munimoona sinto etiini anyu yookuttihiwa enooliva, wala nnari.

143 Muhiye elapo ela emore yinlaka, kahi omorela mootheyani ni moorukuneyani. Muhiye elapo ela ekokhore, erukunxaka murima. Ti yeeyo hiyo entthunaahu. Kahi muhahalaliho wira akhalaniwe atthu anci-ene mukereja. Hiyo onnitthuna otthuka khula epaare ya soowurya sa aalikoro, ohiya sothene iyo s’onvura sikaro, opwanyulasa ikaafirika. Opacerya ekampaanya, ya enamuna ya khalayi, ya Erooho Yoowaarya; vaavo alopwana n’athiyana, othana n’uhiyu, aniipopheyaaya, evekelaka. Miyo kinimooleelani, onrowa okhala mukhapelelo muulupalex a elapo ela otonko aya okhalana. Eyo ekeekhaii.

144 Muhiye eTapernakulu Branham ehiye ololo aya. Muhiye etthikele nno waltaari ni ekhale oratteene ni Muluku. Mwaataane ni anamwaattamanani, ni sikina siiso, ni mukhale oratta-ene ni Muluku. Khamunrowa okhalana hata manyakunyaku ni soowiira soonanara; ninrowa okhala nipuro ninrowa ovara murima olumwenku. Ti yeeyo. Vano, eyo ekeekhaii.

145 Vano owo khwira, “Epantte xeeni Erooho ya Muluku ekhumme aya wa miyo?”

146 Nto Mikaya khwira, “Miyo koomoona Muluku, ni muttitthi Awe, muthukumano Awe, yaari Movuwani.”

147 Moosuwela, Muluku ookhalana muthukumano Iwe, imaara kamosa-kamosa. Owo—Owo onaaruuha Awawe—Malaikha Awe ni annikhalana mu—muthukumano, imaara kamosa-kamosa, Wirimu.

148 Nto owo khwira, “Miyo koomoona Owo okilanthene Veehiceni, ni atthu othene yaarimweemela moonoo woolopwana ni moonoo woorthiyana wa Yoowo.” Ni khwira, “Awo yaanvaanela, “Taani okhanlyahu omphwanyaka wira akhuruwele iwe amootothe Akhabi, wira amukumihe nno ni wira amaliherye oprofeta wa Eliya? Muluku ohimnye siiso, etthu enrowa

okhumelela, tivo hiyo ninrowa woona paahi taani okhanle okhuruwaka.’

¹⁴⁹ “Nto erooho yoowootha khukhuma vathi,” vekeekhai, yookhuma omooroni, “khurwa ohoolo wa Muluku khwira, ‘Miyi kinookhuruwa, ni kinookela mwa alaleyi ale ni kinoowiiriha awo othene olaleerya etthu yoowootha.’” Oh, eyo yaahaananariha. Yaahiwiiriha wiisoona otikiniha, okathi, “Awo yiirale aya, ‘Miyi kinoorowa kawirihe alaleyi ale, khula mmosa, alaleerye etthu yoowootha.’” Vano eyo khukhuruwa khuleya mwa alaleyi ale, nto awo khupacerya olaleerya etthu yoowootha.

¹⁵⁰ Nto, munna, Muluku mmosaru yoowo onnilamulela Veehiceni emosaru olelo. Ni erooho yeeyo emosaru yoowootha enniiraka etthu emosaru olelo, elaleeryaka soowootha.

¹⁵¹ Awo yaahitthikela yiiraka, “Murettele, murettele, murettele,” nuumala Ekhotto Yoopacerya ya Mulaponi mothene.

¹⁵² Mukihiye kiwooniheni otthu okhumme aya. Ekhotto Yoopacerya ya Mulaponi, okathi Fransa, iwe, omuhiyalyawe Muluku, mwa miyaakha saya soopahuwa 90, ni khupacerya . . .

¹⁵³ Vano kinrowa okuxa sa olakeya vakhani, tivo nyuwo othene mukhale oomaala saana minuutu vakhani.

¹⁵⁴ Nwehe, ottuli wu, wopaceryani, oFransa, ti weiwe enyohowelo ni soonanara sipacenyaya toko. Vakhala wira waahinto okhala muttupha wa makhule, ti oParis, Fransa. Ni miyo kinneettaka mukwaha ohalela omaliha yothene, ni nle nipuro nootepaxa kitonko aka woona. Ni oLontres, Inklateera khanihiyo noohiyaxa. Ni Estadu Unidu onookela olukama muliinyani ni yeeyo. Eyo ekeekhaii. Awo vo.

¹⁵⁵ Khula okathi onihononeyaaya olakeya wa athiyana, onihononeya muthana wa elapo eyo.

¹⁵⁶ Nno nyuwo munoorowa, mulaponi mwaya yaawo, ni ohimya wira mwa misiyonaariyu, awo kkenaasivela . . . Aniira, “Munrowa onileela wira exeeni, moota wo wiipa masipo oonanara wa axaar’ihu, wala wa axiruusi ahu? Munrowa onileela moota wo omwalana axaar’ihu? Oniixuttiha moota wo owurya wiskhi ni wira moota siniiraahu?” Ti yeeyo hiyo nikhanlyahu.

¹⁵⁷ Hiyo nniisihana elapo y’etiini, elapo y’eKristu. Ahe, “apakawu” ale wAfrika yaamuwerya oniixuttiha olakeya, moota wo okhala. Nipuro noomalela wuntta, Estadu Unidu, wala, molumwenkuni, ntoko, elapo ela, moota ekhanlyaya. Miyi ka mutthu a wAmerika, vekeekhai. Masi, munna, nkinwerya ohikhala, okathi wa Akhabi wala Yehosafati . . . Ni miyo kihaana ohimya ele Muluku enihimyawe wira Ekeekhaii. Ti yeeyo ekereja entthunaaya weemererya, olelo. Vakhala wira enoorwa eriyari ya elapo ni Muluku, ti Muluku, kweekwe. Ayo, mulopwana.

¹⁵⁸ Nwehe, oFransa, awo aroopacerya wuntta waya wothene, ni ekelelaka ohoolo enamuna yaakhalaya iwe. Vano nto Muluku

khimuruma Alemaanya mpakha wa yaawo, wira aamane vakhani. Vano hiyo khurowa iwe wira noopole esapala aya. Nto nimalakaru wira yeeyo, khuxintta ekhotto, khimuruma Alemaanya otthika, hiyo khukhalana murettele ni Fransa, awo aathikela wa Muluku? Nnari, mulopwana. Athiyana, eviinyu, enamuttompe, etampi ni soonanara vootepa.

¹⁵⁹ Vano awo yiirale exeenii? Exeeni yiiraneieye? Va ti nipuro opacenyawe. Xetwani oookhalaha nipuro nawe nuulupale iwe. Ti vaavo owo opaceny'awe, weiwe wene, onanariha olumwenku, okhuma oParis, oFransa.

¹⁶⁰ Vano, mwaweha vale, owo khaawerya okela mu muhina mwa omurumeyi, vano etthu owo iiraly'awe waari okela oHollywood nno. Owo oookhalaha Holl-...Owo oookhalaha nipuro nawe nuulupale nno oHollywood. Xetwani opakunwe weno, miyaakha vakhani sivinre, muloko ni mithanu wala miloko miili sivinre, ni muttitthi awe muulupale w'anakhotto, khurowa, khukela oHollywood, California. Nto owo ootuphela Estadu Unidu ni ikuru sawe sa xetwani. Ekeekhai. Mihapo sahu sothene sinikhuma oParis. Iyo sirookela oHollywood, ni iteela. Axiruusi ala ni aximiravo, ni itthu, anoookhuma nno, awo anoona ifilime iye.

¹⁶¹ Axinamwane akhaani, ooreera murima, hat'etthu ya nthowa n'awo. Muluku oreerihe mirima saya sikhaani. Kinniwoonela othunku.

¹⁶² Ni opooma weno nno, miyo kaalavula ni yawaka... mmosa wa...mmiravo aka, nihiku nlo. Owo khwira, "Paapa, vakhala wira aakhala amiravo amosa-amosa iwo, opooma, yaarina Erooho Yoowaarya," ni siiso. Nyuwo munimwiikoha xeeni kaarowelaaka oDenver, Colorado, wala nipuro nimoso ntoko nenlo? Kinaaroiha an'aka nipuro nri nikhuru n'atthu aninvekela Muluku; etthu entthunahu, munna.

¹⁶³ Elapo ela, nloko nla, epooma ela, nipuro nla, nirookhala noohononeya mpakha ninoonihaya othunku. Vaakhanle wira kaaniwerya ohimya paahi naanaano va etthu ensuwelaaka mara okhala ekeekhai vaava, hata khiyaarowa okhala yoohimyeya ohoolo wa muthukumano wootakanxeya. Wala, weno epooma yeela weno nno; kahi vaava paahi, masi mapuro makina, mapuro othene, khupacerya orwa paahi...

¹⁶⁴ Mwaha wa xeeni? Atthu...Nkawehani, apatthani, erookhalaxa yoolavilavi. Ekenle vookhweya-vo, mpakha enttiyaya ipumu. Xetwani aakhalaka mmihaponi mwa soowara. Owo khino khokhumme mmihaponi wa soowara, masi owo khohin'ye omwiira nakoso, miyo kinimooleelani yeeyo. Owo nlelo onnimwiira nakoso.

¹⁶⁵ Nkawehani, olelo. Hiyo ninkuxa, ntoko sihimalyaka okathi vakhani ovinre, sa mwamuthiyana, mwali ni ethutu. Mwa nlikanyihlo, ethutu, ti yooreera; eri vale wira yooniweke, eyo

ekeekhahi. Ni ti siiso eryaaya ni ekereja, eyo eri vale wira yooniweke. Ntoko mwamuthiyana ooreera, owo ori vale wira ooniweke. Eyo ekeekhahi. Masi vakhala wira owo...Owo t'oreera, ti yeeyo, owo t'a aiy'awe, owo—owo ori oratteene. Masi owo aahikhalane xoowa a olakeya oowookoliwa vale wira omukhapeleleke, owo onkhala eteeni wa mmuttettheni ni atthu; onkhala a vathixa ni oowuuliha muru ni oowunnta mpakha alapwa yahaarowaya omuweha. Eyo ekeekhahi.

¹⁶⁶ Ni etthu emosaru wa Ekereja ya Muluku mukumi. Anookhuma nno ni ophavela ovara murima ni wiitthokiha, ni wira ntoko... Animwaarula ikuwo athiyana aya nno, va...ni atthu khansuwela wira axetwani ala anootuphela mmaithokoni mwaya.

¹⁶⁷ Wa anamwaattamanani aka nihiku nlo, mwali mmosa, kinuupuwelaaka wira muthiyana ooreera murima, ni owo muthiyana ootheliwa, ohaana mwaana, nto mwamuthiyany'owo aarookhuma vale, mulopwana aarookhuruwela ephiro wira avare muteko mmosa, nto mwaamuthiyany'ola khukhumela vale owanre-ene ikuwo iye sikhaani, aari oonanara.

¹⁶⁸ Nla nuulumo nootepa na Nihiku na Aximaama, masi, munn'aka, mukihye kooleleni etthu: Maama, mutthikele-tho okhala maama!

¹⁶⁹ Hata mwammiravo mmosa aaxekurya anamwaattamanani ahu, aahivolowa khunileela yeeyo, "Nkawehani vate vale."

Miyo khwira, "Ahe, eyo kehiyo hat'etthu."

¹⁷⁰ Muthiyany'owo muthiyana ooreera murima. Nkinihimya wira t'enamuttompe. Masi, etthu ene ti wii, yookhala erooho ya vathi, yoonanara mwa yoowo, enimwiiriha owo wira yeeyo, ni owo khonsuwela.

¹⁷¹ Exeeni yaarowa omwiiriha maama, wala mutthu ti mutthu, owara ikuwo iye sikhaani soonanara, ni wiisooniherya ohoolo w'alopwana? Nyuwo mwa ooreera, murokor'aka. Nyuwo mwa ooreera, maama. Kinnimuxukhuru Muluku mwaha wa nyuwo. Masi, nyuwo mwa ooreera, masi mwaahaakhele Erooho Yoowaarya vo wira ekhapeleleke olakeya iwe, mwaamukhala vooreera mwaakhanle oonanaraxa ahaarowawe okhala mutthu onoowehani, nave khurowa Wirimu. Ti yeeyo. Eyo ekeekhahi. Nkawehani etthu eniiraanyu; olakeya iwe.

¹⁷² Vano, exeeni iyo, xetwani orookela ni khwaaaleela atthu itthu iya. Owo orookela mwa alaleyi; owo onttharihela sa oHollywood. Axiruusi n'aximwali, awo antthariha sa oHollywood. Itthu sooreeraxa sikhalaniwe mulaponi olelo, ya olakeyaxa sikhlanle wiiwiwaka, sinlavuliwa; prokrama othene a muraatiyuni.

¹⁷³ Muthiyana mmosa mutokweene ntoko Muhano Kay Starr, hat'etthu ya nthowa n'uwo; masi omoona muthiyana mutokweene, a miyaakha miloko mithanu, ni sothene, ni ikuwo

sawe sothene sookhumela mwa yoowo, ntoko aamwaraxeliwe mmurupani mwa otthu. Miyo nkinihimya eyo ntoko eperwa, okhala wira kinlavula kivirikanyaka itthu iyo. Masi muthiyana wira siiso, ni ovenya ni okhala ethoonyeryo w'aximwali a wAmerika, iwo olokihiwa wa elapo ahu. Owo ti xetwani.

174 Amiravo ntoko Arthur Godfrey n'akina yeettakasaka nno, yiirasaka itthu siniir'aya, ni atthu oosuwelaxiwa mulaponi siiso, nto, vano, iwo otakhaliwa.

175 Aleluya! Miyo kinihimya eyo okhala wira kinnoona wira Erooho Yoowaarya eri vaava. Otupheliwa onimwiiraneya, onivira ni ikuru paahi empa ni empa, nipuro nnipuro, ekereja ni ekereja, mutthu ni mutthu.

176 Anamwane, mwa Nsina na Yesu Kristu, nvinye mweemele ni mukhalelo wo olakeya wa muhakalaliho ni Pwiya Yesu Kristu, ni mwiire, "Miyo kinookuxa ephiro n'ale vakhani oothanyiwa a Apwiya." Ayo, mulopwana. "Miyo kinookhala maama eekeekhai." "Miyo kinookhala paapa eekeekhai."

Olumwenku wothene, wakirukurerya, ni
munepa aka olosowa,
Vano Owo ti nrromelo aka ni mukhaliheryo.

Maana mwa Kristu, Mwala woolipa, kinnilipa;
Itthaya sothene sikina mithaaka sinkomowa,
Itthaya sothene sikina . . .

177 Exeeni ekhumelelinhe etthu ela yothene? Exeeni ewiirihale arumeyi wira siisa? Exeeni ewiirihale alaleyi waalaleerya yoowootha atthu?

178 Yiirenle-ni yeela, miyaakha sivinre, wira nyuwo atthu aMetotista . . . Okathi John Smith oroihiwaawe vapulpitu vawe, wira alaleerye Ehapari yooreera, vano owo khulaleya mutthaka mmosa woohipisa wa iwoora xexe. Nto owo khwira, "Mulattu aya ti wii, murima aka onookiwereya." Owo khwira, "Aana axithiyana aMetotista hata aniwara ipeetthe mukathani mwaya."

179 Nto, olelo, awo anaawara akaputtula n'ikuwo sikhaani soonanarasa. Ni awo anookhala epwitipwiti voolikana, muhina mwa miyaakha mithanu sikina, yaahiiriwe-ru etthu. Exeeni ewinre-ni nyuwo alaleyi aMetotista, nyuwo aKambpelliita, nyuwo aPatista? Ayo, mulopwana. Ti xetwani, orihale ikuru sawe, ni owo ookhalana irooho sawe sootakhala nno.

180 Ni nyuwo khamunsuwela, nyuwo mwaavuraka asikaro, nyuwo athiyana, ni mwiiraka ntoko siniir'anyu ota iwo, ni nwuryaka ni mwiiseettihaka voothifayi enamuna siniiraanyu, khamunsuwela wira munihela eveneno eyeettiheryo anyu, ni muhononaka maloko othene anrowa woottharani, yakhalaru etthu ene eyo. Ipursento miloko mithanu na miraru ni thanu voowaatta wira aaphwanye kankuru, mwaha wo waavura

asikaro, ni nyuwo vootthuna muniikeliha mwa yaawo. Ni ikereja sinookhaliherya.

¹⁸¹ Ekereja emosa yuulupale Patista, nno, naanaanoxa... Kinrowa ohimya Patista. Kihaana ehakhi yo wira yeeyo; awo mwa enamuna emosa anuuramela epantte kikhumalyaka-wo. Masi okathi awo yaarinaaya ovaha okathi eriyari ya muteko wa exikola ya Ttiminku ni muteko w'olaleya, wira pastore ni othene awerye okhuma yanvure sikaro, ni ephiro yaari yosareya alopwana n'athiyana yaavuraka asikaro. Xetwani onniira yeeyo. Eyo ekeekhaii.

¹⁸² Vano, opooma wahu wenco, mmosa wa arumeyi ahu oosuwanyeya, wenco nno oNew Albany, vapuwani vaava vo othweela, murumeyi ahu yoowo oosuwanyeya a opooma onihooolelaawe eprokrama emosa yo wiina ya axexe, wira aaruheke alopwama ni athiyana vaplataforma.

¹⁸³ Nkincala etthu olumwenku onihimy'aya, nkincala mootaxeeni muneerery'anyu okupaliha; munna, khaavo hata mulopwana ooturuwa onimwaattamela mwaara a mulopwana mukina, ni woona okhala oohitannyeya. Moosuwela wira eyo ekeekhaii.

¹⁸⁴ Awo ahaakuxa athiyana ahu, khwaarula ikuwo; muskiritooriyu mmwe, ni aneettiha itaakisi, awelelaka ni akhuruwelaka mphironi. Nave, awo yaahaana okhala owaani, ottuli wa efikawu, yaapeyaka ni athokihaka yoolya.

¹⁸⁵ Exeeni iyo? Owo xetwani. Otupheliwa onimwiiraneya. Miyo nkinihimya hat'etthu ya mutthu *ola* wala mutthu *ole*. Miyo kinihimya wira iyo irooho sootakhala sinaavara atthu, saaroihaka olukama mwemmo. Otupheliwa wa Estadu Unidu.

¹⁸⁶ Omora w'ekereja. Ekereja yoomoroxiwa ni xetwani. Ottuli wu... .

¹⁸⁷ Onikuxiwa mmiravo mmosa vano, owo aarwaaka oseminaariyu, etthu yoopacerya orinaawe wiixutta okhalana ikharawu sawe. Owo ohaana oxutta pisikoloxiyya. Owo ohaana oxutta teyoloxiyya. Owo ohaana wiixuttiha, okhalana inamuna sothene sa itthu sooxuttihiwa mwa yoowo. Owo aahikhalaneru osoma wooreera saana, owo aahikhaleru oosuwela ni oosuwanyeya ntoko sinweryawe okhala, vano awo anooomola; owo khokhanle othanliwaka. Owo ohaana wira exeeni? Onookhuma va onimooniherya elavulelo yaamukhaani ya poliitika, p'uhimya wene, elavulelo ya poliitika ya okereja, wa nikhuru n'atthu, nikhuru n'alopwana ni athiyana ankhwa.

¹⁸⁸ O Muluku, muniveleliherye axilopwana a enamuna ya khalayi, alimi ahinsuwela ovirikana wa A ni B, ansuwela owerya wa ohihimuwa wa Pwiya Yesu Kristu, yaawo anlaleerya orukunxa murima, ni waaroiha alopwana n'athiyana waltaari, wira emphenteke Pwiya Yesu. [Nipuro vahiitthu mufiitani—Mol.]

189 Iwo olokihiwa. Owo ootuphela iseminaariyu. Owo ootuphela ikereja. Owo ohaarula ikuwo athiyana ahu. Owo oohaapixa alopwana ahu nipuro ahinkupali-aya oleeliwa etthu. Ni alopwana n'athiyana, miyo kinoona wira . . .

190 Nyuwo muniira, "Ahe, athiyana." Ayo, ni nyuwo alopwana munaatthuniherya axaar'inyu wira yeeyo, eyo ennooniherya etthu mpakaniwanyu. Eyo ekeekhaii tu. Vekeekhai. Iwo otakhaliwa. Ti yowooniha othunku.

191 Vano nto mpakha ophiya wa mulaleyi. Mulaleyi onimweemela vaplataforma, olelo, a epulpitu ya vano. Omphwanyaneya vale, n'atthu awe ohoolo wawe, ni onlaleya ya khula etthu yaamukhaani ekhanle molumwenkuni woohikhala sa orukunxa murima ni etampi, ni mwiikimanyo woolipa wa Kristu. Ayo.

192 Sooniheriwaka yookhumelela; atthu animoorwa wiiwa, mmutekoni wa onamalaleya. Oneereriwa okuxa etthu n'ulaleya Ehapari yooreera, ni owiiriha atthu orukunxa murima ni waakhaliha oratteene. Awo anoonanariwa ni anookhuma, awo kharina wiiwaka Eyo. Nnari, awo kharina. Masi, axinna, awo ahaana orukunxa murima wala opweteya.

193 Axetwani! Nyuwo munoorowa oxikola; aatuphela ixikola. Nwehawehe iwo, mulaponi olelo. Nkawehani nno, nyuwo atthu, nyuwo maPrustante. Nkawehani, sookhala ixikola xexe suulupale s'eKatolika ni itthu, sitekiwe olelo. Exeeni iyo? Nyuwo munoorea iwalelo.

194 Hat'etthu ya nthowa ni Ekatolika, kinaamwi kihaaminiki iyo. Miyo ka muPrustante voomalela. Eyo ekeekhaii voolikana. Kinoowerya wooniherya wira awo khani. . . Khivanweryaneya onyakulihana n'awo. Awo aniira, "Hiyo khennicala ele Bibilia enihimyawe. Hiyo ninsuwela ele ekereja enihimyaya."

195 Muluku ori Mmasuni mwAwe. *Mu* ti nipuro Muluku oryawe.

196 Masi aKatolika amosa-amosa, ahinihiya ekerej'aya, yaamuwuulihihani muru mmansinyu, ntoko muPrustante. Nyuwo mwahaamuhiya Bibilia mano, ntoko awo ahinihiyaaya ekereja aya. Khweeli. Masi, awo t'ovonya. Miyo kinoowerya ohimya eyo vathi va owerya wa Muluku Oowerya sothene, wira, awo aavonya. Voomalela.

197 Ni nyuwo maPrustante moovonya, enamuna siniir'anyu, okhala wira vekeekhai munnisuwela wira kahi yoolikana, nave nyuwo muniira. Eyo ennookhalihani anamirima miili. Vekeekhai, iwo otupheliwa; ikereja sivololaka. Nto vano ohiya . . .

198 Ekereja, atthunaka okhaliha ekereja yooreera, oteka ekereja yuulupalexa, ohela sooripithuwa suulupale mwa yeeyo, orkawu suulupale ni ituupu, ni ophwanya sothene wira mphavele wiilikaniha ni ekereja Katolika. Muhiilikaniheke

ni ekereja Katolika, okhalaka wira eyo yoolamuleliwa orowa woopweteyani. Tthiri, eyo ti SIISO ANIHIMYA T'APWIYA, eyo yoolamuleliwa orowa woopweteyani. Nave nyuwo muniilikaniha ni yeeyo, munrowa ni yeeyo.

¹⁹⁹ Masi etthu entthunaahu olelo, kehiyo ekereja yuulupale, yooripithuwa yuulupale, ti altaari a enamuna ya khalayi vaavo itampi simpahiwaya-vo, vathi va mavekelo a alopwana n'athiyana oowiivahererya animphenta Pwiya Yesu Kristu. Nyuwo moosuwela eyo. Ti yeeyo entthunaahu. Mukiiwe, apatthani. Mukiiwe. Nno ophenta.

²⁰⁰ Okathi aka woomala. Miyo kaanithuna tu okhala mwa yeeyo, vaavo, tu, kinookuxa ela, ohoolo vakhani, otupheliwa iyo, mpakha varonwe aya. Yootuphela. Yootuphela ilapo sahu. Yoomutuphela Estadu Unidu.

²⁰¹ Vano muupuwele, miyo nkinatoko othanla kookhalaru, moone, eyo kehiyo etthu yo wiitoottopa-no, iyo ihakhi saka sa wAmerika katthuna wira. Masi kiniwuupuwelaxa apatthani aka, wira kaahela mpuwa mme. Nwehe, miyo kinniwoonaka awo okela ntoko atthu ooreera murima, okhuma ntoko anawiiye, ni miyo nkinthuna eyo.

²⁰² Miyo kirina etthu emosa. Miyo kiri va kitekaka eplataforma ya Mutthu mmosa Yoowo okhanle Namwiiivahererya, nto owo ti Yesu Kristu, ni Yoowo paahi. Kinninvaaha okathi aka wa Yoowo. Ti yeeyo. Nto kawerya-ru ottharuxa ekereja, olumwenku wothene onimwiikhapelela mmansaya. Ti yeeyo.

²⁰³ Masi mukiihiye kooleleni, okathi Mwenye Roosevelt (Mulopwan'owo ohookhwa, muhiyeni amumule, kinniroromela wira onoomumula.), aarookela, aahiivahererya mwa sooruma tthaaru wala xexe, ni khulamulela, okhanyererya woopacerya paahi, kinoowerya owooniheryani yeeyo mwa Soolempwa, vaavo ehimmyaya wira yaamwiiraneya. Ti yeeyo. Hiyo khanrina-tho Malamulo, awo aakheriwa, sothene soonyaanyiwa. Arepublikaano t'otakhala, mmosa t'ottheka, ntoko mukina.

²⁰⁴ Maana, omwene wothene onoorowa onyaanyiwa, masi Omwene wa Yesu Kristu onookhala ni onoolamulela mahiku othene. Ti yeeyo. Vasulu va...Daniyeli aahoona Mwala waathikiliwe vamwaako, khuphwanya olumwenku wa poliitika wa khalayi wu ni khunyaanya khukhala ntthupi nooxiliwa siiso, ntoko etriku vapuwani noweepettha okathi w'elimwe. Masi Mwala ole waahikhala mwaako muulupale waamwareenle mapuro mu-...waasanrye erimu yothene n'ilapo ya vathi. Ti yeeyo.

²⁰⁵ Olumwenku wa poliitika woomalamala. Elapo ahu yoomaleliwa. Munnuupuwela yeeyo, wira Munna Branham oohimya yeeyo, SIISO ANIHIMYA T'APWIYA. Elapo ahu yookomoliwa. Khenkhalakhala evenyaka. Eyo yoomalamala, ntoko ilapo sothene sikina. Elapo yuulupalexa molumwenkuni,

yeemenle olelo, masi epyo ene ya xetwani eroophatteiwa mmurimani mw'atthu; moota eyo ekenlyaya oHollywood, moota eyo ekenlyaya mw'atthuni, khupacerya *yeela*. Ni khankupali waaleela hat'etthu.

²⁰⁶ Mmuhele Mukhulupale vale omphavela omutthuka wiskhi, vano ni okhoottihiwa, moone yaarowa wiiraneya. Owo aampoeliwa, iwoora piili nuumala okela vale. Vekeekhai, owo khokhanle okhalaka mwa yeela; olumwenku wothene ti woomuvirikanya yoowo. Ayo, mulopwana. Khimwaakhanle wira.

²⁰⁷ Eyo yoomala. Eyo yootupheliwa, ni erooho ya komunismu yooxintta.

²⁰⁸ Murowe muxikola mwahu olelo, mwaawehe an'ihu mmaxikolani. Axipatthan'ihu akhani anrowa oxikola, nyuwo mwaahaana tu osuwela eniiraneya. Axiruusi nno muxikola, ni itthu siiso, a munnuwelo wa miyaakha muloko ni mixexe ni muloko ni mithanu, aximaama aya animwaaroiha oxikola, ni muupuwelo, olakeya woohononeya, oolya sookhwiha nantiirya, oolya soohapala, anamanvura sikaro, sothene sikina siiso; a munnuwelo mukhaani, axinamwane akhaanixa siiso. Yaamukhala yoorika omphwanya harusi eriyari ya amosa-amosa a yaawo ntoko saarowaaya okhala omphwanya sikano mmalaxini, weiwo ankhalanaya okumana vamosa ni aximiravo, ni wummaathi mukerekhere mwa miratthi iya ni mapuro othene makina.

²⁰⁹ Ni kinoowerya owooniheryani, apatthani aka. Nkaakhanle oohimyaka ela vapulpitu kahaasuwenle etthu enihimy'aka. Sa ixikola nno mmu—mmunisiipiyu sahu, wenno nno munisiipiyu iya, s'axiruusi ale awarasaka, nkisuwenle...yaahimeeryaka aximai aya wira anrowa mapuro makina, ni ekumanaka ni amiravo ni ehawalanasaka mphironi mwa oLouisville (Exeeni iyo?), ni anniipa mukoraaleni.

²¹⁰ Okhala wira, awo arina Ehapari yooreera yaamukhaani y'opatthani omphwanyaneya vale, vaavo alaleyi aneelaya n'ulavula itthu soohi-maana, ni ihantisi sikhaani sa mBibiliani, wala etthu siiso, ohiya olaleya orukunuxa murima ni waaruuha alopwana n'athiyana waltaari.

²¹¹ Tiithi awe omphiya ohiyu n'umpattiha soona, onwurya ekoopho ya saravexa, onookilaathi ni owurya yeeyo. Amaama ari ota, nihiku nothene, ni nikhuru n'athiyana oniirani na iturufu, etthu y'opatthani siiso. Munwehererya sayi wira mwaana onookhala etthu ekina?

²¹² Nwehe, nipuro munkhalanyu-vo, ti yeeyo nyuwo mukhanly'anyu.

²¹³ Mmukuxe mwanamwane mwamuthiyana, mwanamwane mwamulopwana, mwaahelase ota nno, mwaahiyase ekhale ni mutthu. Mmukuxe mulopwana, miyo pooti omukuxa mmiravo

aka, omuhiya okhala ota nihiku nimosa ni mutthu; mukihiye kivolowe, kweekwe kinoowerya wooleelani taani aarinaawe. Vekeekhai. Nwehe, nipuro nlo, erooho eyo enoonvara.

214 Nyuwo munoovolowa mukereja, mwemmo atthu othene. . . munoovolowa mukereja mwa Erooho Yoowaarya, wala—wala ikereja sa Pentekosite, awo aniiythana siiso. Atthu othene ekhale. . . Oh, awo anootthimaka ni wookolela muru aya nno ni nno, pastore onimookola; nwehe ekereja yothene opacerya wira etthu emosaru. Mwaahiye alopwana, atthu, ovenya ni—ni wiiseettiha voohiloka paahi, wala etthu ekina; nwehe etthu yothene wira yeeyo. Nvolowe nipuro nimosa vaavo pastore okhanlyawe ookhaleleya ni ooriirya; nwehe nikhuru nothene wira yeeyo. Mukele nipuro nenlo.

215 Munoomukuxa mulopwana okhanle mulopwana oolakeya saana, ni mmuhiye amuthele mwamuthiyana ohinifayi hata esentavo emosa; khivanrowa opisa vanci-ene mpakha owo nave ohifayi esentavo emosa. Ti yeeyo yaamwiirale Akhabi. Mukuxe yeeyo, nno ni nno, mmuhiye mwamuthiyana ooreera murima atheliwe ni mulopwana mmosa ohinifayi esentavo emosa; naanaanoru, owo oniira etthu emosaru ntoko owo.

216 Kaarowa owerya orowa sayi, voosiis'ula, ni othoonya matata aka itthoko sikurumunwe ni itthu siiso, vaavo aximai oophenteya atheliwe ni paapa namuhapaliwa, ni itthu siiso, nto yuupuwela wira awo yaamuwerya wira etthu ni yoowo, nto vano maama othene ni othene aya anoowurya ni wiiseettiha voohiloka. Ti nipuro.

217 Exeeni iyo? Owo xetwanii. Owo xetwanii, otuphela. Owo orokela voowaakuva mulaponi mu, ntoko mwatto onooapa mirika. Owo orimwiikhaliha nno nipuro nootepa oreera awo yaarinaaya, oHollywood. Owo khwira, “Miyo kinoowerya okuxa ifiilime nno mpakha etelevisawu orwa, nto kinimwaakuxa.” Vano owo khukilaathi vale.

218 Nto atthu a mukereja, ohiya otthuka isineema ni ohaahiya an'aya orowa, awo anaavaha isentavo muloko Ttiminku oxekuwa ni waaruma iwe, wira aweryeke okhalana muthukumano mukhani wo ottikha iturufu, okhala ota meekhaaya ni weettiha iwo. Oh, otakhaliwa xeeni. Vano awo anootthukula paahi etelevisawu ni woona elolo yothene yoonanara, yoowunta ekhanle molumwenkuni, mwemmo. Ti yeeyo.

219 Miyo nkirina hat'etthu ya nthowa ni esineema. Nkirina hat'etthu ya nthowa ni etelevisawu. Ti etthu yowunta eri mwemmo. Ti yeeyo ekhanle. Yaakhalihwe yoolakeya, yaamukhala yoolakeya.

220 Khisaakhanle otumihiwaka ixapattho sootthuka ipitawu opooma nno, olelo, nnakhala. Athiyana khantthuna. Awo

antthuna ikatha sa munawoni vate. Athiyana akina anniira. Ti yeeyo.

221 Mwaarowaka okereja, khakhanle otumiheriwaka etiini ya okathi wa khalayi, okhala wira, muthiyana mukina, owo khontthuna, nnari, khontthuna etthu ni yeeyo. Nnari, mulopwana. “Khivantthuneya orowa iwe. Miyo kinnaamini paahi, khintthuneya-tho etthu.” Oh, munna, ni xetwani, onnaamini. Ekeekhai. Nyuwo munoorukunxa murima wala munoopweteya.

222 Vano, kinnoona othunku; nnari, nkinoona. Nnari, nkinoona. Nnari, kinnikumiha ehimmwe. Miyo kinnaaphenta atthu. Masi miyo—miyo—miyo—miyo kinnoophentaxani wira kiwooneni omora mpwinaka ni muru siiso. Muluku atthuna vale, kinootthikela yeela okathi vakhani ohoolo esumana yeela.

223 Vano, wa aximaama mukhanle aximaama, nuulumo nimosa paahi wa nyuwo muhinatthi orowa. Muluku ooreeriheni. Mwaalele an’inyu oratteene.

224 Ninootthikela otupheliwa nno; nihaana okela mmaitthokoni nlelo, ni mapuro manci-ene, ixikola, ni ota mapuro ni yeela. Ninookuxa ela.

225 Masi, otupheliwa wa Estadu Unidu, xetwani oomukuxa. Muhimoove Ruusiya. Ruusiya khorina nnaata. Hiyo niniira mmansihu, wuntta wahu yoohi eriyari ahu. Ti yeeyo.

226 Moosuwela, Estadu Unidu ookhalana miyaha s’omwalana soowaatta ovikana olumwenku wothene? Omwalana wunci-ene; muupuwele yeeyo. Kahi yootakhala? Omaama woohononiwa. Aximaama khankhala-tho owaani ni an’aya, ntoko siirakaya. Awo ahaana okhalana muteko.

227 Nno nihiku nlo, mulopwana mmosa a mulooca epooma yeela, aalavula ni miyo yeela. Athiyana ala anvara muteko mukaafirika sa anamunci-ene, axithiyana ala ootheliwa ni nikhuru n’anamwane axikhaani. Awo aakhalana anlela mwaana anaakhapelela ana aya. Awo anvara muteko mapuro ala a anamunci-ene. Khwira, “Yaahikhala aili a yaawo yeemenle vale, okathi yaahiihiwaya, miteko saya s’anamunci-ene, khwira, ‘Muhivelavele. Hiyo ninoowerya wiirukunxa, khula enamuna.’”

228 Oh, okathi xeeni w’enamuttompe vakhiviru. Vekeekhai. Xetwani ohaaleela wira awo t’akhulupale a vatthokoni. Awo anoopaka musurukhu aya. Awo animwiira etthu antthunaaya. Nto nyuwo mukumihe ela mwa yaawo, mwawerya vale.

229 Eri etthu emosa paahi enwerya okumiha eyo mwa yaawo, eyo ti altaari, ohoolo wa Yesu Kristu, etiini ya khalayi, ya muro wa maithori enrowa waariipiha murima ni waahiya kapatti-kapatti, ni waakhalaha ele yaathuneya awo okhala. Ti yeeyo.

230 Awo khino anuupuwela wira miyo ka mutthu oowuuluvala paahi. Masi nihiku okathi onkhwaanyu, munn'aka mulopwana, muthiyana, munoosuwela wira kooleleni Ekeekhai. Ti yeeyo.

231 Onimwiiraneya, otupheliwa, okathi ori vaava. Vano, vano, ayo, okathi mmosa wo othanla, nave, okathi mmosa wo othanla, kahi wo orwa okereja, masi okathi wo othanla vakhala wira munrowa omurumeela Kristu wala okhala ookuttihiwa mukereja mwanyu. Nto ti yeeyo.

232 Aakhala mamempuru anci-ene a mukereja. Vakhala wira mame-. . . ahiiso atthu a wAmerika anihimya okhala aKristu, yaakhanle aKristu eekeekhai, aKristu ooyariwa vasya, munna, hiyo naamukhala oolipa ntoko mwaarow'anyu okhala Wirimu, ohalela, ikhotto ni mikattyamiho, ayo, mulopwana, iretta saamurowa ohiya elapo, itthu sothene sikina.

233 Khiyaarowa okhala saana okhuruwela ephiro omoona muthiyana onaattamela, ni mulopwana, "Ehaali anyu, munna? Mooxeliliwa, munna"? Murwe, khekhanle. . . Nyuwo khamunivelavela hata vakhani. Sothene siri saana pahi. Nto mwaapara onoophiya vanloothoni v'ephiro; ohiya ophavela woophitani, owo aamweemela, iire, "Vaareera, munna. Vaareera, nyuwo mwaarina. . . Oh, nyuwo miyo kihinatthi," moone, waaputi paahi. . . Eyo khiyaarowa okhala yooreerexa? [Muthukumano oniira, "Amen."—Mol.] Hiyo ninoorowa okhalana, masi eyo ti oMileeniyu, munna. Nihiku ninoorwa. Ti yeeyo. Tivo vano hiyo khani. . .

234 Miyo kaari wa namwaattamanani ahu, nno nihiku nlo; nkirina hat'etthu ya nthowa n'anamwaattamanani ahu, masi kinniweriya owoona an'ihu axikhaani. Amwaar'aka yaamunla. Meetiku mmosa a epooma ela, mwaaruusi awe aathweela ni mwan'aka mwaamuthiyana, n'awo yaaniphentana mmosa ni mukhw'awe; mpakha osuweliwa wira nsina nawe aari Branham, ni wira owo aari mwaana a Reverendu Branham. Eyo yaahimaliha mwaha. Mwaaruusi khaawenrye-tho okhuma ni mwan'aka mwaamuthiyana. "Wulu," Miyo khuupuwela, "ahe, vaareera."

235 Anamwaattamanani amosa-amosa akhaani khutthimakela weiwe, khwira, "Ahe, yaari saana." Tivo, khurowa wa pastore aya. Muhikileele. Moosuwela, miyo—miyo kihaana enamuna y'osuwela itthu sinci-ene, moone. Vano awo—awo khurowa wa pastore aya, khwira, "Moosuwela, okhala mulopwana okhanle namwaattamanani ahu, t'owaareerela murima an'ihu." Khwiiriwa, "Ti Reverendu Branham. Owo onimwaaphwanya, waakuxa mukamiyawuni mwawe yaamukhaani, ni waaroiha weetakasa."

236 Khwira, "Ahe, uh, *Uhum!* Hiyo khanrina hat'etthu ya nthowa ni Reverendu Branham. Owo mutthu ooreera murima, masi, moone, owo muxovo woovirikana w'atthu

ohiya ele nikhanlyahu.” Ayo. “Hiyo, miyo—miyo kaanithuna mwahaakhanye...moosuwela, miyo mwa enamuna emosa nkaarowa... Mulavule ni yaawo, mukhale oopatthani, masi eyo ekhale emalelo.”

²³⁷ Oh, munna! Amwaar’aka yeemenle vaavale, yinlaka. Miyo khwira, “Oophentiwa, eyo eliinya yoovalaaniha. Miyo ni etthoko aka, kinimwaarumeela Apwiya.”

²³⁸ Hata wira olumwenku wothene onoohiya; onkhala Yesu Kristu! Vakhala wira kihaana wiihaniwa namathipelela, vakhala wira kihaana othanyiwa ni mmu-...mutthu ntoko miyo, n’itthu siiso, miyo nlelo kinimuthanla Yesu Kristu. Nvarele ntata na Muluku nihinrukunuwa. Apatthani a vathi yoonyanyalani, nlelo mukhalaxe vakhiviru va Yoowo. Mmuvarelele Yoowo.

²³⁹ Muluku, mukihiye kilaleye ntoko sihitonko aka khalayi. Mukihiye kaalaleerye atthu anookhwa, ntoko mutthu onookhwa, yoomi. Mukihiye kaalaleerye atthu ntoko wira khokhanle mutthaka mukina wira kilaleerye. Mukihiye kaakupalihe orwa waltaari, ni wiitho wunlaka, ni maithori; atthikele owaani ni akhaleke ntoko aKristu, ni akhaleke wa namwaattamanani aya. Ahiye othweela nno wothene ni weettasa iwo, ni otupha ni wiiseettiha vonanara; ni yiiraka enamuna *ela*, ni enyemaka mwaha wa *ela*, ni erowaka epantte *ile*. Oh, muhiire yeeyo. Owo ti xetwani. Irooho iye sa xetwani sinnaarweela aKristu.

²⁴⁰ Muupuwele, arumeyi ale iwe, awo yaari maprofeta ale. Awo yaari maprofeta. Awo yaari atthu anatiini yaavaha mukuttho. Awo yaari anatiini saana ntoko awiixuttihi a nihiku nla, masi, munna, awo yaarisa ottaiwene wo osuwela ekeekhai.

²⁴¹ Khamunoona moota xeeni xetwani okhanly’awe natiini? Xetwani kahiyo etthu ya nwanani, etthu yuulupale ntoko komunismu, sothene soowanana oKristu. Kehiyo. Eyo ti ya, oh, ahe, ya xetwani, vekeekhai, masi kahiyo nwanani a Kristu. Nwanani a Kristu natiini saana, natiini saana. Yaari erooho y’etiini yaamukhomenle Yesu. Kweekwe onkhalaka olumwenku wa etiini, atthu anatiini, anikhomela. T’atthu anatiini yaari oonvirikanya Kristu eekeekhai. Yaari maprofeta anatiini yaari oonvirikanya Mikaya. Ti atthu anatiini a nihiku akhanle oovirikanya Mutthaka wa Muluku.

²⁴² Muupuwele, miyo kihoolopolani. Miyo kihooleelani. Miyo nkinlavulaxa mwaha w’Ekatolika, ni aPatista ni aMetotista; miyo kinaahimya atthu ari a osantu, vathi va iliinya iya. Nkawehani eyo olelo, moota yiisoonihenryaya ni yeemenlyaya va yookhumela. Oh, wulu. Miyo kaahaana okela mwa yeeyo, khula okathi. Ni murim’aka onkhala woowiiniwa muhina mwaka.

²⁴³ Weemela vale ni banjo a khalayi, murumihaka banjo owo a khalayi, ni mmurumihaka viyela owo mukhaani a khalayi siiso, “Ti yoola namompe a oTexas *Lexe ni lexe?*” Miyo nkirina

hat'etthu ya nthowa ni mulopwan'owo; masi eyo ti ota iwe molumwenkuni ota iwe. Ti yeeyo. Miyo kaamuthanla okhala, munna, kihikhalanne etthu, ya, nnakha etthu mara, masi weemela paahi ni ovenxa matat'aka ni wira, "Yesu, mukikhalihe vakhiviru va mwiikimanyo." Ayo, mulopwana.

Mwiikimanyo woovahereriwa miyo
kinookuxa,
Mpakha okhwa okitaphula,
Nuumala kinoorowa Owaani ekhara kaware,
Maana yookhala ekhara wa miyo.

²⁴⁴ Wa nyuwo aximaama axikhaani va voosiis'ula, munkhalaka aximaama eekeekhai, ni koosuwela wira aakhala anci-ene a nyuwo; Miyo kinoona wira, khula mmosa a nyuwo. Mukihiye kooleleni etthu. Muluku ooreeriheni. Nyuwo mwa Ehapari yooreera ya neethanu, wuupuwela waka. Mukihiye kooleleni etthu vano wa an'inyu, etthu ekhaani paahi. Okhala wira, Munna Neville alakela onoolaleerya e. . .ya maama olelo ohiyu, wala onakhaleru pani, mmosa a hiyo onlaleya, vaareera, mwaha sa aximaama. Masi, nwiriyane, mukihiye kookoheni etthu.

²⁴⁵ Muupuwele, okathi Moise aaryawe mwammiravo, aari maama aamwiixuttihale. Aari maama ooreera murima aamuhenje Moise mwaamukhaani vamakuthani vawe, khwira, "Moise," khimuxuttiha sothene. Owo aari mwiixuttihi awe, ahiiso, awo yaari mwiixuttihi awe, kiireke, vathi va Farawo, khwira, "Vano, itthu iya," khwira, "Moise, nihiku nlo munoorowa owoopola aana a Isarayeli. Nyuwo mwa mmiravo mwiitthaniwe. Mukhale ooloka ni ooreerela wa olumwenku, okhala wira nyuwo mwa yoowo. Nyuwo mwa yoowo."

²⁴⁶ Khanivo hata nipuro nikina ninsuwelaahu, vaavo owo aatonko awe orowa oseminaariyu, hata mwiixuttiho nnakhala, aatonko awe waakhela. Owo aakhanle empa ya mwene ya Farawo, yoowo aari pakawu; masi ame awe yaahimuxuttiha. Owo maama eekeekhai. Owo aahimuxuttiha makano a Apwiya. Owo aahimuleela moota aarinaawe okhalaka oowaarya. Owo aahimuleela moota ni etthu owo aarinaawe okhalaka, ni moota, etthu Muluku aarowaawe wira, aarowaawe omwiirela. Ni ela yaahikhala ni Moise mahiku othene a ekumi awe.

²⁴⁷ Ni khula maama ooreera murima, eekeekhai, oororomeleya onrowa waakuxa an'awe axikhaani, ohiya waaroiha osineemani ni moowiinani, ni sikina siiso, nto owo onimwaahela ottuli wawe ni waaxuttiha sa Pwiya Yesu Kristu.

²⁴⁸ Nno nihiku nlo, kaalavula ni maama mmosa mutelefoonini. Nto maama owo khwira, "Oh, Munna Billy," owo khwira, "mwan'aka oowooniha othunku ori mmukattiyamihoni." Khwira, "Oh, mukattiyamiho xeeni owo oryawe-mo."

²⁴⁹ Miyo khwira, "Ayo, koosuwela eyo, munna, oophentiwa." Nto owo khwira, "Khino oovonya. Miyo nkisuwente." Khwira,

“Mmosa onihimya *ela* nto mmosa onihimya *ele*. Miyo nkisuwenle. Masi,” khwira, “hata wira oroovonya wala ori saana, miyo kinnimpheenta owo.” Eyo eri vo, “Miyo kinnimpheenta owo.”

²⁵⁰ Owo khwaaleela ame awe, khwira, “Miyo nkireere wootoithiwa *n’ila* ni *ele*.” Khwira, “Maama, kookupali wira nyuwo mwa mutthu mmosa paahi oosivela vekeekhai kirinaaka; muthiyana okhanle oororomeleya wa miyo, ni ohinikihiya.” Iwo ophenta wa maama. Owo ti maama eekeekhai onrowa ompatikha mwan’awe. Voohicala sintoko ohiira saana wala oroovonya, owo onoothikela amphavelaka. Nto vakhala wira Muluku. . . Vakhala wira maama onniwerya wuupuwela yeeyo wa mwan’awe, khivatempe Muluku wuupuwela yeeyo wa Awawe. Munnona? Mukhale vekeekhai ni Yoowo. Muroweke oratteene.

²⁵¹ Nto vano mukihye kooleleni sa maama mukina, kaakuvaka, mBibiliani, nihinatthi omaliha. Aahikhala maama mmosa ihaniwa Herotiya. Owo aamuxutinhe mwan’awe mwamuthiyana wiina. Owo aathuna wira akhale oosuweliwa. Vano owo aahiina ohoolo wa mwene, nto khuvekela muru wa Yohani Mpatisa. Hiyo nihaana oolempwa miloko mithanu na miili a osuulu awe, mwali ola aainale ohoolo (mwaana muthiyana a Herotiya), aainale ohoolo wa Heroti; miloko mithanu na miili a osuulu awe, awo akhwiiye anamararuwa wala wiiheya.

²⁵² Mai mmosa aamwiixuttihale awawe itthu sa molumwenkuni; maama mukina aamwiixuttihale awawe itthu sa Muluku. Mmosa aahikhala muhooleli muulupale ni muxintta, ti oohikhwa eriyari y’atthu olelo; nto mukina t’ohononeya ni omooroni, ni ohaakuxa ikonto vaara ikonto sene ni yoowo. Munnoon a nihimya’aka? “Mmulele mwanamwane ephiro entthuneya wira eetteleke.”

²⁵³ Ni vekeekhai kinnookhupanyeryani nyuwo aximai oohaawa mukilaanthe va ni ithutu sanyu soottelea. Yookhala Erimu weiwo maama oronwaawe-wo, olelo, weiwo maama a enamuna ya khalayi aamukhalela Muluku, alakela ovinre-awe epantte ekina y’ekuwo. Owo onoolipelela nyuwo orowa. Eyo ekeekhaii.

²⁵⁴ Miyo kinnoottittimihani ni woolemelihani nyuwo vo ni ithutu sanyu sooxeerya. Ame anyu, mwaathunaka owiirela etthu p’itthu, mwiire mahiku imiya tthaaru ni miloko mithanu na mosa ni mathanu khula eyaakha. Murowe owannyaya mwavahererye mavekelo, ni mmukhaleleke Muluku. Eyo t’itthu yo wira. Ni mwaalele an’inyu. Nto an’inyu yannuwa vale, awo anoowiihanani “ooreerihwa,” mmanle-ene ovira epantte ekina y’ekuwo. Eyo erooho y’eekeekhai ya omaama, erooho y’eekeekhai ya nihiku na aximaama. Nihiku n’aximaama ti mahiku imiya tthaaru ni miloko mithanu na mosa ni mathanu khula eyaakha.

255 Nla ti nihiku antumihwiwa maluwa ni ovahana soovaha, olumwenku onnira. Ela yavira vale, olumwenku wakhalaru miyaakha miloko miili mikina, awo anookhalana mahiku a aana alopwana, mahiku a aana athiyana, ni, mahiku a munna mwamunna, ni mahiku a haalu, ni itthu sothene iyo siiso, voophiyerya paahi okeliha olumwenku wo okuxa murima mwaha wa nakoso. Ti weiwo tthiri ela enrowaya, enlukama omooroni, ni ikuru sothene tu sinwery'aya, opwetexiwa.

Masi, nyuwo, Muluku ooreeriheni, ti mavekelo aka. Nivekele.

256 Tith'ihu ooreera murima a Wirimu, nitthokelelaka sivinre, voosiis'ula, ni miyuupuwelo sahu, otthikela ottuli wu, miyaakha imiya sene sivinre, okathi weemenlyawe Yehosafati eemenle-awe vale mpararini mwa Mwene Akhabi. Ni Erooho yaamukhaani mmurimani mw'awe, nlelo yaahanle ya Muluku, onaamwi aavonnye, yaahimuleela, khwira, "Ela ti yoovonyeya. Ela ti yoovonyeya. Kehiyo yooreera. Kehiyo yooreera. Profeta oohimya wira itthu iya khisaakhanle okelelaka ohoolo siisa." Nto Mooro mukhaani wa Muluku khunvenxa.

257 Vano nto Nyuwo mwaahimuleela mutthu wira aakhule Mooro owo mukhaani, yoowo aari Mikaya, profeta eekeekhai a Muluku. Onaamwi owo khino aakhumelenle vale owanrene mattapwatta, onaamwi khino owo aakhumelenle vale oothanyiwa, ni othene aya enwehaka yoowo ntoko wira yaari akhwatte enwehaka mwaapwittipwitthi. Masi owo aahimye ekeekhai, vanaamwi yaarina ommana wiitho, vanaamwi aarina oriheliwa mukhatteya ni okhuurihiwa mukatthe ni maasi a ohaawa. Masi, nnakhala vo, moolumo owo aahimaly'awe yaahiraneyaya, maana Nyuwo mwaari ni yoowo.

258 Muluku, munivahe, olelo, nto hiyo ninweha mBibiliani mu. Hiyo ninweha muliivuruni sa ekereja, itekaaloku, ni sikina, sa ikereja, meera, ni wona moota awo aniir'aya *ela, ele, wala ekina*. Masi munihye niwehe Mmasuni mu eekeekhai va, noone etthu Awo anihim'yaya: "Woohikhala owaarya, khaavo onrowa owoona Apwiya. Mutthareke murettele ni oreera murima, woohikhalana, yoowo, khaavo onrowa owoona Apwiya. Ole omphenta olumwenku, wala itthu sa molumwenkuni, ophenta wa Muluku khokhanle mwa yoowo."

259 "Mahiku ookiserya onimoorwa okathi wooxanka. Athu anrowa wiiphentaka mmansaya, owiisoona, oowiittotopa." Oh, itthu iyo suulupale, Pwiya, sinkhumelela. "Oothipelela, owiisoona, oosiveliwa itthu sa vathi ohiya opatthana ni Muluku; awiixuttihaka atthu makano a—a atthu ohiya sooruma sa Muluku; yooneyaka ntoko oothunku, nave akhoottaka owerya wa Erooho Yoowaarya" wira emukhalihe mutthu osareya Erooho, wira emuhakalalihe, wira emukumihe maithori mmaithoni mwawe, wira emukumihe orowa waavekelela aretta, wira emulavulihe ilavulelo ni otaphulela, wira emulaleerihe.

Erooho ya Muluku, Muluku mukumi, awo arookuxa Eyo khukeliha mpuwa mwa muloko wo opatthana wala etthu siiso, “Yooneyaka ntoko oothunku, ni akhoottaka owerya waya nave.”

²⁶⁰ O Muluku, muthukuman’ola mwaamukhaani, nihiku nla, ovenye voowaakuva, naanaano va, ehinatthi orwa emalelo ya okathi, ni oniphwanya ni mukhalelo yoola. Hiyo nikhale, niisuuluule mmansihu, ntoko Bibilia sihimaly’awe, “Nvenye mwiitathe. Ni mukoherye ephiro ya khalayi, ekhanle ephiro yooreera, nto mwaphwanya vale, mweetteke memmo.” Muluku, munivahe wira niwerye ophwanya ephiro ya khalayi yoolipa, nawerya-tho okhala vamosa, ntoko imiya, ni nitakanxe matata ahu niipe.

Miyo kinookuxa ephiro n’ale vakhani
oothanyiwa a Apwiya.

Miyo kipacenrye weetta ni Yesu ni kinoorowa
mpakha woomalelani.

Muluku, munikhaliherye okhala yeeyo ni otthara makhalelo a yeeyo.

²⁶¹ Mwaareerihe aximaama ala othene oophenteya akilaanthe va, Pwiya; nisuwelaka wira awo aximaama, yaawo, ni ithutu sootteela sooheliwa mukasakoni mwaya, voosiis’ula, ntoko muupuxeryo wa maama mmosa oophenteya ovinre epantte ekina ya nipuro. O Mwaneene Ekumi, mwaareerihe, Pwiya. Ni awo ereerihiwe, nave-tho, ni wira miyuupuxeryo sa an’ya sikhale ntoko sikhanyaya sawaya ni amey’aya, vakhala wira awo aarowa epantte ekina y’ekuwo, Wirimu woovuwa. Munivahe, Pwiya.

²⁶² Nto voosiisu omosa okathi ekumi ennikhumaaya mmutikani mwahu, ni ephumu ahu envonyaya orwa wa hiyo, ekuwo enoottukuwa-tho; awo anoekhuruwa, khino, mpakha wookiseryani wa Yordani, wira enikhaliherye olapuwa. Oh, mpakha nihiku nenlo noovuwa nahela-ru inawu sahu iwe, weiwo ohinrowa okhala. . . Ettheke khenrowa orava mwiixi wa sikaro. Khonrowa okhala namuhapaliwa mphironi. Khonrowa okhala namuttompe. Khenrowa nnakhala okhala-wo etampi. Khenrowa okhala-wo hat’etthu siiso. Masi, mwa ovuwa wa mahiku othene, ninrowa okhala ni murettele ni Pwiya’ahu Yesu Kristu ni an’ihu. Nto, oh, nihiku xeeni nooreerexa.


²⁶³ O Tithi, okathi epiphi yuulupale eniiraneyaya, ekhotto, ni xetwani atuphelaka ilapo, ni atuphelaka ipulpitu, atuphelaka ikereja, aatuphelaka athu, aatuphelaka anakoso, atuphelaka ipooma, ni ixikola ni itthoko; O Muluku, munikhaliherye okhala, nimpurule xoowa naakuvaka niwane mwaha wa Muluku, ntoko Moise ni a—ni aLevi siiralyaya iwe okathi etampi yaary’aya vapuwani. Munikhaliherye, Pwiya.

²⁶⁴ Munilevelele vano, ni munireerihe. Ni munikhalihe oowiiyeviha, munipwanyule, Pwiya. O Muluku, Nyuwo

muhimbye wira, “Ole onkhuma, aalaka ni maithori, veekhai onoothika, atthapaka, aruuhaka mavisi.” O Muluku, munipwanyule kapatti-kapatti. Munuupe, vasya, Pwiya. Hiyo khaninreere okhuma mphironi.

²⁶⁵ Miyo kiri, yoomi, Pwiya, kiniphiyerya nipuro kinkhalaaka kuupuwelaka sa akavi anrowa orwa vamuthukumanoni vaka. O Muluku, kintthuna wira Nyuwo murwe. Murwe, Pwiya! O Kristu, murwe Pwiya! Mukinyakatte; mukuupe. O Pwiya, muhikihiye, nnakhala kihelaka itthu iyo mmuupuweloni mwaka. Muluku, mukhalihe iyo ottaiwene wa miyo.

²⁶⁶ Mukikhaliherye, Pwiya, olaleya, ntoko sihimaly’aka, okathi vakhani ovinre, ntoko mutthu onookhwa onaalaleerya atthu anookhwa, nisuwelaka wira hiyo othene nihaana woonana ni Ohimala. Nihaana okhala ohoolo Wanyu; okathi Nyuwo ohinrowanyu okhala oosiveliwa, okathi Nyuwo ohinrowanyu omoriwa ikharari, okathi Nyuwo onrowanyu ohikhalana omoriwa ikharari; okathi Nyuwo onrowanyu okhala, ooviruwa, wira muruuhale olamuliwa ilapo ni atthu ankhoottaka ni anthanyaka ophenta wa Mwan’Inyu.

²⁶⁷ Muluku, mukivahe omoreliwa ikharari ni Yoowo olelo, wira Nihiku nenlo kiwerye okhala oolipa. Khino kihaana wunla vano, masi Nyuwo munookukuttha, okhale ohakalala, okathi owo, Nyuwo mwairaru, “Nvoloweke moopuhani mw’Apwiya, mutthokiheriwanyu okhuma opattuxiwaka-ru olumwenku.” Muluku, mukhale ni hiyo vano, ni munikhaliherye, hiyo ninvekela, mwa Nsina na Yesu. Amen. 

54-0509 Otupheliwa Wa wAmerika
Branham Tabernacle
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org